



鐵網珊瑚書品卷第七

吳郡朱存理性父集錄

郭天錫詩卷

題宋春卿城市山林

功名身外聊復爾丘壑胸中實過之盤谷壽康懷李愿
輞川瀟灑友王維何人使氣鐵如意老子放懷金屈卮
市井收聲涼夜永竹風杉月亂書帷

普照寺楚山閣

白衣處士息羣機高閣登臨送夕暉吳地荒涼征馬盡
楚山空濶斷鴻飛晝閑塔影來朱戶月落鍾聲殷翠微

直下先人弊廬在暮年蓮社得相依

大年便面

疎雨灑荷氣微涼生柳陰閑亭不受暑坐占清湖心無
客且罷碁有風宜披襟向來行路錯足底黃埃深此意
一領會落日孤蟬吟

爲僧作山水

門有方袍客圖成水墨山我非求肖似汝亦愛幽閑密
樹難分辨高雲任往還行當絕世事終老屋三間
有客被方袍合爪前致辭不獨愛公畫仍復愛公詩詩
成縱意書了此一段奇世人稱三絕公胡不自知我心

了不知晚歲聊嬉嬉向來用世心轉首成棄遺所嗟聞
道晚倏已雙鬢絲前賢去已遠來哲未可期寓形宇宙
間俛俛欲何之願誨藥石言再拜真吾師

三月十日寄了卽休

白水起寒霧蒼林騰濕煙會心圖已竟假筆竟難傳一
晤空中色相忘定外禪裹茶來竹院風雨落花前

送樂伯善赴都

石磴雲昏荀蕨香江城花落燕鷺忙黃金臺高地形聳
白玉堂深春日長之子顯擢神所與道將亨民小康
臨行握手出軟語東鄰夜雨淋糟牀

燕趙感慨鼓俠氣江湖搖落嗟虛華艱危歷盡爲憂國
事業無成非戀家江光隱見魚龍窟雲海蒼茫鷗鷺沙
桃花水長三月暮片帆挾雨飛天涯

篆籀堆牀窺逸跡歌詩到耳遺古音歲華正似阮孚屐
世事真成昭氏琴剪毛肥羊快一飽泛駕駿骨輕千金
暄風拂帽春衫薄小憇宮牆楊柳陰

趙千里小景

鸚鵡喧柳陰生鶯樂清泚竹風遞荷氣長夏涼如水王
孫翰墨仙丹青絕純綺何當着幽人艇子沙頭艤

元暉山

灌木蔭滄洲閑雲疊層巘茅茨在只尺逕路渾莫辨黃
家玉印章翰墨屹冠冕悵望海嶽菴禾黍西風轉

下隍朱氏竹山圖

鳳臺東南山萬里山人宴坐何從容乾坤清氣不可遏
一夜春雷起籀龍詩家襟度蔚蕭爽百尺琅玕日應長
我欲驅車訪此君只恐山林杜來往

題米南宮像

海岳菴空骨已仙風神超邁畫中傳凌雲健筆飛光怪
不顧人間喚米顛

題滿川花馬趙子昂作

曲江洗刷雲滿身雄姿逸態何超羣眼中但覺肉勝骨
幹也合讓曹將軍嗟哉今人畫唐馬 亦出曹韓下
玉堂學士重名譽一紙千金不當價山牕擁雪觀畫圖
據鞍便欲擒於菟天廐真龍有時有杜老歌行絕代無
客有蓄青玉荷盤色奇古檠杯作蓮蓬下屈爲柄上
覆作蓋蓋十九點青質而紫章匠氏剗爲蓮房殆奪
天巧故人元復初命不肖賦詩

碧雲亭亭水天永翠蓋翻風墮秋影文姬團扇感初涼
露華亂落明珠冷紫莖綠葉歌秋蘭涉江折得煙蓬還
前緣已被專房誤守宮血點猶班班麴生邂逅誇奇特

倒捲滄溟供一吸太華峰高歸路遙但覺滿懷春拍拍
俗眼傲睨琉璃鐘金罍未用爭誇雄嗚呼古詩調高和
者寡擬喚杜陵醉中把右近詩數首書遺了堂高弟林
上人 界

了堂上人方外友如天錫者情爲至矣故其手跡盈篋
每皆惜之不令有所散逸雖俗士有不及之者宜勤師
拳拳不忘歐公於冥冥中也錢良佑跋

饒介之詩帖

病中對梅花一株欣然有作若有會也錄似

西塾孟載季廸兩先生一笑

介頓首

病中雅量豈堪論澄水能清撓則渾除却妙香無長物
祇應靜坐洗煩言幾叢晚菊今耆舊一樹寒梅老弟昆
曾住鍾山安石里傍人猶恐我爭墩

書後見剩紙就寫上所有者夜坐一首

學默三年漫不膺流光一去意無徵緣如髮白因循染
道似山青自在凝猶有形骸生影跡却將文字寄名稱
一川月色多於水更著秋霜見底澄

夢中一首

流水無心競孤雲與我同坐深明月下行盡亂山中花
落聞啼鳥松涼愛御風懸知皆夢境一笑萬緣空

至正廿五年十二月十日在采蓮涇梅花樹下寫

東望大瀛海影落扶桑弓三洲直如矢正射三山中三
山負曉日曉日波浪紅仙人不騎鶴所適多御風秦君
家三洲長與仙人通卽之不可見忽爾能相面翩翩頭
上巾舉舉塵中扇高談清暑知子不貧賤閒居寡良
儔有酒不自薦此日亦足醉况得邦之彥小醉須解醒
大醉不用醒平生慎許可祇有一劉伶太湖三萬頃七
十二峯青頗貯山水秀閉門修酒經白雲生硯石疎雨
灑牕櫺子上三洲去手杯猶未停

昨賦此送秦文仲博士還三沙今李察秀才來誦

此遂書遺之介叟記

新詞藁

文英皇恩百拜

瑞鶴仙癸卯歲爲先生壽

轆轤秋又轉記旋草新詞江頭憑雁乘槎上銀漢想車
塵纔踏東華紅輓何時賜見漏聲移涼宮夜半問蓴鱸
今幾西風未覺歲華遲晚一片丹心白髮滴露研朱
雅陪清燕班回柳院蒲團底小禪觀望罨罨明月初圓
午夜應共嬋娟茂苑願年年玉兔長生聳秋井幹

沁園春冰漕鑿方泉賓客請以名齋邀賦此解

澄碧西湖輓紅南陌銀河地穿見華星浮影仙碁局靜
清風行處瑞玉圭寒斜谷山深望春樓遠無此崢嶸小
渭川一泓地解不波不涸獨障狂瀾老蘇而後坡仙
繼菊井嘉名相與傳試摩挲勁石無令角折丁寧明月
莫浣規圓謾結鷗盟那知魚樂心止中流別有天無塵
夜聽吾伊正在秋水闌干

玉漏遲瓜涇度中秋夕賦

雁邊風訊小飛瓊望杳碧雲先晚露冷闌干定怯藕絲
冰腕淨洗浮空片玉勝花影春燈相亂秦鏡滿素娥未
肯分秋一半每圓處卽良宵甚此夕偏饒對歌臨怨
共一嬋娟幾許霧屏雲縵孤兔淒涼照水曉風起銀河

西轉摩淚眼瑤臺夢回人遠

古香慢自度腔夷則商犯無射宮賦滄浪看桂

怨娥墜柳離佩搖蒨霜訊南圃謾憶橋扉倚竹袖寒日
暮還問月中游夢飛過金風翠羽把殘雲剩水萬頃暗
熏冷麝淒苦 漸浩渺凌山高處秋澹無光殘照誰主
露粟侵肌夜約羽林輕誤剪碎惜秋心更腸斷珠塵蘚
路怕重陽又催近滿城細雨

齊天樂慢毗陵兩別駕招飲丁園索賦

竹深不放斜陽入橫披澹墨林沼斷莽平煙殘荷剩水
宜得秋深纔好正著酒寒輕弄花春小障錦西風半圍

歌袖半吟草 獨游清興易嬾景饒人未勝樂事長少

柳下停車尊前岸幘同撫雲根一笑秋香未老漸風雨

西城暗欺客帽背川移舟亂鴉溪樹曉 荒亭旋掃

思嘉客賦閏中秋

丹桂花開第二番東籬展却宴期寬人間寶鏡離還合
海上仙查去復還 分不盡半涼天可憐閑剩此嬋娟
素娥未隔三秋夢贏得今宵又倚闌

蘇武慢賦芙蓉 文英百拜

藻國淒迷麴瀾澄映怨入粉烟藍霧香籠麝水膩漲紅
波一鏡萬粧爭妬湘女歸魂珮環玉冷無聲凝情誰愬

又江空月墮凌波塵起繡鴛愁舞 還暗憶鈿合蘭橈
絲牽瓊腕見的更憐心苦玲瓏翠縠輕薄冰綃穩稱錦
雲留住生怕哀 暗驚秋被紅衰啼珠零露能去聲西風
老盡趁東風嫁與

八聲甘州和施知言姑蘇臺韻

步晴霞倒影洗閑愁深梧灑風漪望越來清淺吳歛杳
靄江雁初飛輦路凌空粉冷濯妝池歌舞煙霄頂樂景
沉暉 別是新紅闌檻對女牆山色碧淡宮眉問姑餘
游鹿應笑古臺非有誰招扁舟漁隱但賦情西子却題
詩閒風閒月闌消磨盡浪打鷗磯

自度腔高平探芳新賦元日能仁寺薄游

九街頭正軟塵潤酥雪消殘溜禊賞祇園花豔雲陰籠
晝層梯峭空麝散擁凌波縈翠袖歎年端連環轉爛熳
游人如繡 腸斷迴廊竚久便寫意濺波傳愁蹙岫漸
沒飄鴻空惹閑情春瘦椒栝香乾醉醒怕西牕人散後
暮寒深遲迴處自攀庭柳

自度腔小石江南春賦張葍翁杜衛山莊

風響牙籤雲昏古研芳銘猶在棠笏秋牀聽雨妙謝庭
春草吟筆城市喧鳴轍清溪上小山秀潔便向此搜松
訪石葺屋營花紅塵遠避風月 瞿塘路隨漢節記羽

扇綸巾氣凌諸葛青天萬里料謾憶尊絲鱸雪車馬沒
休歇榮辱事醉歌耳熱天與此翁芳芷嘉名紉蘭佩兮
璫玦

水龍吟賦惠泉山

艷陽不到青山淡煙冷翠成秋苑吳娃點黛江妃擁髻
空濛遮斷樹密藏溪草深迷市峭雲一片二十年舊夢
輕鷗素約霜絲亂朱顏變 龍吻春霏玉濺煮銀瓶羊
腸車轉臨泉照影清寒沁骨客塵都浣鴻漸重來夜深
華表露零鶴怨把閑愁換與樓前晚色棹滄浪遠

姜石帚以盆蓮百餘本移置中庭讌客同賞賦拜星

月 文英百拜

絳雪生涼碧霞籠夜小立中庭蕪地昨夢西湖老扁舟
身世歎飄蕩暫賞吟花酌露尊俎冷玉紅香疊洗眼眩
魂迷古陶洲千里翠參差澹月平芳砌甄花混細浪魚
鱗起霧益洗障青羅洗湘娥春膩蕩蘭烟麝馥濃浸酒
吹不散繡屋重門閉怕便綠減西風泫秋檠燭淚一作外
過西湖先賢堂傷今感昔泫然出涕賦西平樂 文

英

岸壓郵亭路欹華表堤樹舊色依依紅索新晴翠陰寒
食天涯客又重歸歎廢綠平烟帶苑幽渚塵香蕩晚當

時燕子無言對立斜暉追念陰風賞月十載事夢惹綠
楊絲畫船爲市天粧艷水日落雲沉人換春移誰更與
苔根洗石劍井招魂謾省隨車載酒立馬臨花猶認媽
紅傍路枝歌斷讌闌榮華露草零落山丘過此西湖恨
擬西洲羊曇淚落沾衣

丁香結賦小春海棠

香嫋紅霏影高銀燭曾縱夜游濃醉正錦溫瓊膩被燕
蹋暖雪驚翻庭砌馬嘶人散後秋風換故園夢裏吳霜
融曉陡頓闌動偷春花意還似海霧冷仙山喚覺環兒
半睡淺薄朱唇嬌羞艷色自傷時背簾外挂淡月向立
秋千地懷春情不斷猶帶相思舊字

花犯郭希道送水仙索賦

小娉婷清銘素靨蜂黃暗偷暈翠翹欹昨夜冷中庭
月下相認睡濃更苦淒風緊驚回心未穩送曉色一壺
葱蒨才知花夢準湘妃化作此幽芳凌波路古岸雲沙
遺恨臨砌影寒香亂凍梅藏韻熏爐畔旋移傍枕還又
見玉人垂紺鬢料喚賞清華池畹臺栢須滿引

友人泛湖命樂工以箏笙琵琶方響迭奏賦還京樂
文英

宴蘭澈促奏絲縈筦裂飛繁響似漢宮人去夜深獨語

金縷玉冰
胡沙淒哽對雁斜
玫柱瓊瓊弄月臨
秋影風吹遠河漢
去裏天風飄冷泛
清商竟轉銅壺敲
漏瑤牀二八青娥
環珮再整菱歌四
碧無聲變須臾翠
翳紅暝歎梨園今
調絕音希愁深未
醒桂楫輕如翼歸
霞時點青鏡

宋仲溫詩帖

秋日懷兄弟

秋至轉相憶蕭蕭
落木初如何去鄉
國不見有音書漂
泊全無定存亡半
是虛風塵幾時靖
還似昔同居
相別幾多時相思
淚滿衣家貧經難
久世亂得書稀作
吏誠全拙從軍事
亦非鄉心秋塞雁
盡日向南飛

懷何孝廉

絕憐何有道老節
獨居貧孝義今誰
及交情久更真清
齋將十載小隱欲
終身別後音書斷
相思入夢頻

清明前五日宋克書舊詩三首

南宮生傳

渤海高啟撰

南宮生吳人偉軀
幹博涉書傳少任
俠喜擊劍走馬尤
喜彈指飛鳥下之
家素厚藏生用周
養賓客及與少年
飲博遨戲盡喪其
資逮壯見天下亂
思自樹功業乃謝
酒徒去學兵得風
后握奇陳法將北
走中原從豪傑計
事會道梗周流無
所合遂遡大江游
金陵入金華會稽

諸山蒐覽瓌怪渡浙江泛具區而歸家居以氣節聞衣冠慕之爭往迎候門止車日數十兩生亦善交無貴賤皆傾身與相接有二軍將恃武橫甚數毆辱士類號虎冠其一嘗召生飲或曰彼醜不可近也生笑曰使酒人惡能勇吾將柔之矣卽駕往坐上座爲語古賢將事其人竦聽居尊下拜起爲壽至罷會無失儀其一嘗遇生客次顧生不下已曰懼生而起他日見生獨騎出從健兒帶刃策馬踵生後若將肆暴者生故緩轡當中道進不少避知生非懦儒遂引去不敢突冒訶辟明旦介客詣生謝請結驩生能以氣服人類如此性抗直能辨好

箴切友過有忤已則面數之無留怨與人論議蘄必勝然援事析理衆終莫能折時藩府數用師生私策其雋蹶多中有言生於府府欲致生幕下不能得將中生法生以智免家已貧然喜事故在有饋酒肉立召客與飲啗相樂四方游士至吳察其賢必與周旋欵曲延譽上下所知有喪疾不能葬療者以告生輒令削櫬疏所乏爲請諸公間營具之終飲其德不言故人皆多謂生似婁君卿原巨先而賢過之久之稍厭事闔門寡將迎關一室屐歷代法書周彝漢硯唐雷氏琴日游其間以自娛素工草隸逼鍾王患求者衆遂自閤希復執筆歆慕

靜退時賦詩見志泊然處約若將終身生姓宋名克字仲溫家南宮里故自號云

贊曰生之行凡三變每變而益善尚俠末矣欲奮於兵固壯然非士所先晚乃刮磨豪習隱默自將履藏器之節非有得能之乎與夫不自知及違遠道德者矣

會稽楊維禎廉夫

庚子歲贈

東吳宋仲溫工古歌詩尤工諸家書法余有所著必命仲溫書之且扁舟訪余東海角觴咏數日而別爲賦長歌一解酒餘使歌之余和以鐵龍之嘯不知人間世復有過余樂者不余旣醉書此歌復令仲溫書

遺玉笥崆同兩生者和之

宋才子玉雪表鐵石腸裔出蘭臺大夫後才似祁庠大小之雙郎龍伯國長鯨未築封豕未屠蚩尤張天天鵲塗白日不照東西隅東相府西將府爭致人才出門下宋才子高步野鶴不噉腐鼠喏喏恥僕臣嚶嚶羞妾婦歸來閉關彈五絃浩歌激裂驚千古宋才子莫論秦莫美新城中酒薄不醉人尋我鐵龍東海濱鐵龍雄飛雌亦走鐵仙九招重入手海水未西傾扶桑未左紐倩爾五色毫飲以酒一斗不書汝祖九辨弔湘纍大書鐵龍九招傳不朽

饒右丞介之論書贈仲溫 丁未歲贈

太白流西荒音響一何切蒼精散暘谷光彩爛昭晰靈
氣垂八芒雲漢自茲挾人文旣開張象畫亦區別冥機
不自見直待智者發誰能懷邃初心焉悟皇頡閉門工
造車出門卽合轍古人有成言得之盡毫髮流形歸自
然萬古字不滅將同造化功豈獨在書訣神哉嶽瀆經
煉石補天裂

玉筍生張憲思廉贈 四首

大王風息塵漲天邊烽鬼燐紅飛煙劍倚高穹懶磨刃
弓挂搏桑未上弦冰凝霜沍江南道偃蹇寒梅雨中老

鐵心不屑作和羹紅杏枝頭春意鬧宋才子第一人卿
寵 奴佞臣姻不諧 宴不終圍人耻隨青袍白馬橫
梁境肯學銅爐鐵筋匡徐君登科只許大兄先奪錦已
傳佳句新宋才子溫如玉商之孫子多伶俦能武能文
唯爾獨惟爾獨何不取中尉獨檀代成功治太平鼎食
開元祿文武名成吾爾錄

江南羽化張天雨海上神交宋仲溫楷法鍾繇稱獨步
草臨皇象已專門折釵未墜風前股漏屋先凝雨後痕
寄語臨池諸俊彥虻蛇雞鶩莫須論

吳生抱綠綺爲我操春江洄泐收沙漱飛濤濺石砥岸

低風振柁船靜月窺牕萬派朝宗意鍾期信少雙
興盡抱琴歸江空歲暮時孤城天拍水長路雪漫岐日
月催年事關河啓夢思胸藏幾兵甲能壓布帆遲

高啟季迪贈醉歌

書足記姓名劍可酬恩讐少學兩不就空作澹蕩游與
君相逢在東州赤氣浮面非凡儔驅車欲過公子宅苦
心莫伸涕橫流黃雲已蔽燕國晚白露正滿梁園秋天
高海濶無處往借問何以銷煩憂千石酒萬戶侯請君
論此誰當優吳門日出花滿樓醉眠不須遣客休君留
綠綺琴我脫紫綺裘今朝春好能飲不東風吹散江南

愁

高季迪奉答感舊五十韻

魯酒且緩傾聽君放歌行君歌意何苦慷慨陳平生少
爲鬪鷄兒鮮裘奪春明走馬出飛彈撇捩誇身輕氣伏
諸俠徒不倚父與兄落花錦坊南美人理粧迎綠雲晚
不度樓上鳴瑤箏酒酣迸五木脫帽呼輸贏及壯家已
破狂游耻無成太白犯紫微三辰晦光精金鏡偶淪照
干戈起紛爭中原未失鹿東海方橫鯨遂尋鬼谷師從
之學言兵石室得陰符龍虎隨權衡業成事燕將遠戍
玉關營巖谷雨雪霏哀獸常夜鳴撫劍起流涕軍中未

鐘山瑤峯集卷一
知名奇勲旣難集迴臨石頭城石頭何壯哉山盤大江
橫黃旗歇王氣玉樹沉歌聲晚登臨滄觀愴惻懷古情
覽時識禍機不因憶尊羹飄然別戎府溧水罷東征裸
衣佐刺船臨危釋猜萌歸來訪鄉閭亂餘掩蓬荆舊宅
人已改荒池泉尙清瘦妻倚寒機正歎伊威盈相迎不
相笑伏雌爲重烹從茲謝行役閒園事躬耕昔同徒步
人十年擁麾旌鴻毛獨未順蹭蹬違霄程知音竟爲誰
四海嗟惓惓齊竽不解奏楚璞何由呈懶求薦辟書傲
然揖公卿衰蕙弔蟋蟀柔柔喚鸚鵡閉門節屢變壯魄
空潛驚顧我雖腐儒當年亦崢嶸小將說諸侯捧盤定

從盟大欲千萬乘獻策登蓬瀛洪瀾阻川途浮雲蔽天
京終焉困澤畔日暮吟離蘅賤貧此時居復與喪亂并
何殊九月中嚴霜折枯莖頗聞君子心道窮貴益誠已
志不獲施安用軒裳榮所以不苟出出則時當平今晨
喜逢君有壺對前楹風日初澹沲櫻桃作繁英適意不
一醉屑屑徒悲縈達人若相遇大笑絕冠纓

雲林處士倪瓚元鎮所贈三首

并序

至正乙巳三月廿四日仲溫高士與沈文舉共載訪
奈笠澤東渚之蝸牛廬中相從過玉明宅煮茶留坐
遂以永日吹笙鼓琴於水光林影間但恨吾子儀遠

在數十里外不得同此集也廿五日仲溫別余他之
漫成長句以寫余懷瓚

三月將闌春欲夏循簷共看辛夷花階前淪茗香照色
坐上吹笙清不譁拄杖偶過公子宅班荆宛似山人家
宋玉才情何可得肯拋塵土踏江沙

江上欣逢宋仲溫蕭條古道向君論我居笠澤已十載
看竹唯君我欵門

宋公天下士畫竹能鼓琴來我北渚下相從論古心

放歌行贈宋君

汝陽周砥履道

辛丑

今日非昨日今年非去年天地不同老日月豈停旋寸

心搖搖顏色改只似秋蓬與夏蓮柏梁賦詩不早長
楸走馬未得前閶闔九重虎豹守我欲上訴無因緣荆
山泣玉徒自苦夷門抱關誰復賢寶劍夫容拂秋月高
歌對酒聲哽咽當時輕意千古事幽憤于今向誰雪蘭
臺公子天下奇心膽豈足他人知荆卿不答魯勾踐項
羽肯顧齊安期東吳市上花漠漠相逢意氣傾山嶽笑
說秦關百二重卷舒風雲不盈握一生不識平陽奴况
是霍家馮子都明珠白璧等糞壤玉環翠袖皆蟲蛆甘
心廓落事屠釣矯如游龍不可拘宋公子爾彈琴我放
歌白晝苦短夜何多黃金高臺幾千尺翳日浮雲奈若

何

放歌贈宋君仲溫

雲間沈鉉 文舉

宋君曠蕩士儒服非狂生筆掃千軍陳胸藏數萬兵銛
豪破紙竟何益按圖折禦分縱橫魚麗鳥翼談者易野
雉家雞人目盲當時管樂已黃土白壁往往遭蠅營荒
城 啓塵四塞拔劔斫地浮雲行十年驅走向豪俠
人一諾千金輕低頭拜東野捐官識韓荆苦心爲知己
嗜膽執仇爭 西入關裝刀從北征途窮亦知時不
利俛首抑氣隨將迎蕭蕭破屋漏星雨妻子顧笑形神
清東家小兒袴褶鞍馬好西家老

成爾獨

胡爲昧生理長軀七尺誇人英城頭雨聲如建瓴泥汗
厚地天無晴我留君家醉十日謔浪顛倒呼儂僮請君
棄擲几上筆爲君拾留牆角檠眼中世事如轉目勿謂
貧賤忘交情氣酣中熱雙耳赤細語向人肝膽傾玉壺
擊缺歌浩浩不作老腐咿嚶聲促君起望東南氣
泰堦何夕平我有長策君有長纓危可安亂可寧慎勿
輕受虞人旌慎勿虛看處士星丈夫事業須磊落富貴
逼君君莫驚

詩送仲溫先生還吳

沈鉉

江城蕭索西風起行逢故人驚夢裏憂深自覺少容顏

食盡唯愁拙生理看君白髮何由得
相逢更悲喜
筆力隨年老愈深詩思逼人鳴不已每呼石丈卽低頭
獨寶蘭亭誇死近來英氣減前時酒量仍非向來比
從渠門第沸如羹自保情懷澹如水城南只友高書記
謝官歸來接鄰里交游散落苦無多世事悠悠竟如此
明朝忍去別江頭楓葉蘋花送行李
燕山曾燿蜀人王燧會稽唐愚士洪武廿一年四月旣
望同觀于應天府學之東齋

周履道詩

題雜畫四首

離離江樹暗芳洲江上西風幾度秋別鵠未歸天又晚
不勝清怨憶丹丘
亂雲飛雨晝漫漫水閣風林五月寒我憶越江江上苦
扁舟今向畫中看

我憶草堂臨澗阿月明夜夜到松羅今朝見畫懷歸去
收拾閑情託詠歌

水濶天低欲盡頭柳花如雪暗歸舟平生解識滄洲趣
何處飛來雙白鷗

對春雪一首

璫葉綴玄圃玉羽翔伊川翻霏九霄下呈芳二月前低

鍾繹玩珠卷七
迴隔簾翠玲瓏入綺錢欲消不自駐已斷復成連珠幃
疑華潔花池舞影妍相思梁園暮曾賞洛城年

昨日賦得此詩寫奉元度孝廉一笑王成老蘇刻還
致二本餘以五環送之復其元值也望致之春寒佳
否砥再拜

初月十七日梅花有便索一枝見惠甚佳砥

尚朴齋一首

言甘知有吝味旨閑其多居恒屬念慮抱朴心靡他淳
風返元化至體適平和意勝惟自然道存諒不磨營營
彼澆俗機巧滋煩苛身偕百憂長奄忽其奈何

風雨一首用高季迪韻

貧富不相直衰榮固有時行哉徒自速止尼未爲遲崎
嶇千萬塗辛苦豈要辭風雨羣雞鳴壞屋起晨炊一日
不解醉千古有遺悲如何屠釣人敢爲帝者師

題吾子行遺墨後

立世守茲道毅然生死間奄去同其盡榮辱豈相關若
人固可悲弔溺吾所艱蕭瑟見遺墨風雨慘容顏秦唐
去我遠二李無時還世傳斯有在邈哉不可攀

芸閣讌集得磬字

休沐出自旦騰步非所樂偶茲芸閣賞得遂中林約朱

錢維新詩集卷一
三
輪交廣衢綺麗涉紛錯寧復知閒燕飛蘿散雲壑池魚
可以觀幽蘭可以握金題耀緗帙粉墨間揮霍覽物千
古上興謠契冥漠總總不復云悠悠付觴酌朋簪旣已
盡善戲不爲虐志適孤興遠物遣萬慮薄於世本何資
逍遙每恒若行矣空谷深撫心慚場藿

贈葉秀才一首

日暮登高臺浮雲蔽遠陰樹木何蒙籠野雀噪繁林驅
車涉關塞岐路鬱且深借問子何之故鄉阻崎嶇曷不
蹙栖息蓬藿非所任隱憫不發威遲旣前臨脆管促
飛觴鴟絃舊逸音仗劔從此別秋風滿懷襟寡立步非
窘薄游志不沉策馬欲俱去我無當世心

送淮南蘇同簽赴鎮

大江洪流若奔馬橫截中天向東寫吳楚風煙浩蕩中
海門赤日光相射上將氣吞雲夢澤猛士聲振長平瓦
靈旗遙指濠泗間神戈蹙駐狼山下萬民不擾農業興
白叟黃童在田野文武之道惟張弛固識賢才天所假
去年開闢今復來歡呼動地聲如雷願翻長江作霖雨
沛澤何止沾枯芟我欽當時羊叔子峴山之碑傳未已
清德九世其在君緩帶輕裘自茲始

送趙一陽真士歸雪上

渺渺晴湖白鷺飛青山迢遞夕嵐微閒操桂楫雲生腋
欲采芙蓉露滿衣紫翠房深丹竈暖松杉秋靜鶴巢稀
明年去覓封君達應駕青牛說息機

次韻介之夢山中

松花金粉落春晴白鶴看碁如客行疎雨竹牕緣是夢
隔林茶臼只聞聲繁華久困心何得澹泊相遭思亦清
不有鹿門高世志山中幾日道能成

送李用和之常熟知州

落日孤城近海邊川光九道直如絃朱幡到邑歌來暮
玉帳論兵思去年楚水南迴多賈舶虞山西望少人烟

從來惠化同甘雨還使殘民得灑然

元度中舍持此紙須近詩謾錄如上元度年妙才俊
清辭麗翰有足高於人者尙有以取此何哉山野人
硬語政自不滿一笑耳至正二十年六月八日勾吳
周砥

竹林陳氏雜帖

宗遠先生復入虛白齋余喜承教有日因成短歌一
章以求笑政

竹林先生陳夫子白髮鬢鬢垂兩耳著書眼似秋月明
爲文思入青冥裏近來學得神仙術欲向山中餐石髓

世間自有仙人居何必蓬萊三萬里先生一去竟莫迴
我嘗勸之留不止如何擘破山中雲却被茅君強招起
至正壬寅立冬日浯溪辱友朱志道再拜書

奉和中秋翫月佳什三首錄上

虛白先生宗遠隱君同發一笑

鮑恂再拜

昔年爲作蟾宮客曾向宮中看玉輪萬丈高懸金粟樹
三更影落絳河津生憎老兔深爲窟却笑仙娥不嫁人
回首歸來舊塵世滿天風露一吟身

數年不對中秋月月色依然不負秋嬾問仙人修玉樹
且陪帝子上瑤樓斗牛低繞天樞轉河漢斜橫左界流
却望蓬萊宮闕遠幾隨清影重回頭

浪說今宵明月好干戈滿地幾人看惟堪院落清尊賞
忍照沙塲白骨寒綵筆寫殘思縛兔玉笙吹罷擬乘鸞
知君此會非忘世只爲良辰一笑難 至正庚子中秋
后五日在玩易齋書

次韻劉季章治中邀夏仲信郎中游永安湖詩二首

金粟寺中公廨靜白晝事閑如治蒲沙棠爲舟穩可泛
郎官之湖今豈無啄花鷺坐水楊柳雪藕人歌山鷓鴣
日西上馬踏歸路小隊高呼驚道吾

湖上筵開張水戲捲幔涼風吹短蒲大魚聽樂浪頭出

小艇賣花城內無丙鼎庚庚識饕餮甲煎班班炙鷓鴣
酒酣賦詩動海色親紙楷書能寄吾

向會附字問起居想達聽司光弼員外詣門下迨今
不知何在今因稟從道便敬寫前詩以通近信新民
先生有無辜之累政在府上所見不齊之中能無斯
文之念轉一語爲解紛乎從道公差至彼望分付僧
房住七五日更望作成早回尤好從道菊坡甚愛其
誠謹倘有書附菊坡廷傑托之毋妨鄙藁在鐵厓先
生處煩討付從道回幸幸思邈二府會間道意稍涼
往見也六月十八日布衣生顧阿瑛詩帖上

子剛判府先生 元璞卧病弗能作書囑筆申敬

金粟道人和劉別駕 上詩有啄花鷲坐水楊

柳雪藕人歌山鷓鴣之句此詩一出便覺鐵厓不得
擅體又徼老鐵同韻走筆賡去不能奇也嘿菴虛
白兩明府共賦必有錦囊中語拈出一奇也

秀州城外鴛鴦湖郎官颿開十幅蒲人游玉壺天上下
鳥度屏風山有無起舞或呼謝鷓鴣賦詩爭傳鄭鷓鴣
酒酣不怕歸路晚將軍曾識李金吾

老鐵禎詩帖上和畢煩粘卷送達

金粟所也

次韻觀帖之什

水如燕尾出湖分合入長溪直到門韋杜桑麻元兩曲
朱陳雞犬却通村換羊賣馬囊中帖剝瘦懸匏竹裏尊
昨日煩君來閱賞扁舟短纜繫籬根

次韻癸卯除夕

仰觀北斗轉遙天春在寒爐爆竹邊夜列粉盤循舊俗
曉看羅帕賀新年燒餘葶蘆生當路雪後梅花開滿煙
不用鞭灰覓如願客囊剩有酒家錢

次韻甲辰元日

異鄉元日身強健兒女欣欣各有家禾秀連莖秋合穗

雪裁五出曉分花天開象魏星辰逼地接幽燕道里賒
三徑不荒松菊在白頭且覓醉生涯

夜宿三塔次陳元朗韻

水落南湖不露沙又牽舫子到僧家春浮大斗涓涓酒
寒隔虛櫺薄薄紗半夜 鈴傳梵語一杯江月照梅花
坐來詩句生枯吻指點銀瓶索煮茶

海上留別復初長老

通玄寺裏游三日剪剪輕風透薄寒一樹山茶開朶朶
五更百舌語般般看山且喜秦川近把酒休歌蜀道難
不得攜筇上金粟摩挲天冊舊碑看

承寄諸詩讀之不忍釋手隨卽和復適往禾興失於
寫上昨日又辱見和八詩合溪行卷始不寂寞矣鄙
作附呈併求竄改 顧阿瑛載拜

博文先生

館下

正月十五日呵凍書于不二室

元夕與婦飲

問夜夜何其睠茲燈火夕月出屋東頭照見琴與冊老
婦紀節序清夜羅酒席右蠻舞裊裊左瓊歌昔昔婦起
勸我酒壽我歲千百仰唾天上蜍誓作酒中魄勸我飲
此酒呼月爲酒客婦言自可聽爲之浮大白 老婦曰
人言天孫思妃不如月娥守孤不知羿婦相棄以犇

曷若織女相望以久之也錄呈子剛節判宗唐秋官
一笑竹林先生見此煩繕寫一本到秋官牙仍要光
和見教 老鐵禎再拜

賴善卿到嘉禾爲作金粟道人詩使瀕行曰金粟吟
友爲元璞尊者胡爲無詩走筆一解兼東西白仲銘
兩宗匠一笑

琦公口有綺語債年來不誦西胡經宮詞在古無師利
野史于今有贊寧劫灰何曾燒汲冢世祚時聞語塔鈴
林下寧無讀書者夢中應見伍喬星

至正辛丑立秋日老鐵禎在雲間清唳亭試郭玘墨

唐律一首上寄 節判相公尊先生

鳳皇亭亭江水長
令人清夢憶瀟湘
坐來深樹當春雨
舍近分陰到野棠
一柱空標王日月
千金誰買漢文章
壯懷無賴憑詩遣
覲紙封霜少府堂

陸椽郎行書

此以奉起居語意不工萬希賜教餘無言

扶風

馬庸再拜上

次韻元璋先生簡奉 訥齋判府相公一笑

倅車新赴雲間幕
文采風流有譽髦
未許萑蘭初客佩
又承雨露染恩袍
濃薰酒漬紅螺甲
清夢華生玉兔毫
退食郡齋無一事
詩成渾似柳儀曹

辛丑六月望高平瞿智書于龍江之通波草閣

長句四韻奉贊 郡倅相公先生伏干郢削

銀章朱紱照熊軀
特命東吳最上游
綵筆判花分半虎
鸞刀解節少全牛
一官樵李風生幕
午夜雲間月滿樓
爲報廬江毛孝子
故人張奉在南州
諸生張樞再拜

舊作錄呈希過日正之至祝 上史右轄甘韻

天下中興日名臣
第一功長才王佐
畧壯節古人風德
業蕭曹並威名李
郭同從容三代禮
磊落萬夫雄闔令
秋霜肅牙旗曉日
紅勒碑因入蔡賜
樂豈和戎翊戴尊
王室勤勞答聖躬
捷書聞薊北惠政
遍山東淮海民皆

仰荆楊貢復通壺漿來父老歡詠及兒童掣電驚神駿
穿雲射過鴻乾坤今運泰狐兔已巢空哀服三台近麻
宣極品崇雲臺圖漢將赤舄美周公楚塞秋吹雨吳江
夜落楓壯懷思附驥吉夢兆非熊素有依劉念將陳報
國忠賈生憂世切阮籍歎途窮恩禮多蒙被周旋誓始
終敢從鞍馬後擬見賦彤弓

送謝叅軍陳長史一律

朔風吹雪滿貂裘朝覲寧辭萬里游河水南來依故道
關山北去近神州春明玉殿衣冠盛花覆宮筵禮數優
共說中興漢天子雲臺今已畫公侯 至正壬寅春二

月六日錢方再拜宗遠聘君尊先生

送瞿慧夫上青龍鎮學官詩序

予每讀句曲外史所詠送瞿博士上青龍學官詩愛其
華婉新麗飄然有仙氣欲口占效之輒困譬學爲頌不
之魯不工是時予猶未識瞿君也至見其人魁岸溫偉
風致皦然愕曰是稱其詩之情者也益慕與之游居頃
之行日與游者及校官大夫士共爲飲餞則屬余爲贈
言語云送人以其軒不如送以言言不可已也先聖王
設爲庠序之教以厚民性以修人倫以正國俗其仁溥
矣猶以爲未足又爲校室以 所謂家有塾其制也夫

金剛經疏卷一
民散處田廬遠于國中而不與入 學則爲置塾以編
教之故其人雖不身與禮樂文藝之事固已習聞其論
而孝弟忠信之節皆以素講而力行奇袤之行異端之
言不入于耳目當是時聖人之教洋溢乎宇內此頌聲
所由作而君子所以屢致意焉也今青龍學官不特爲
塾庶幾庠序之重蓋千室之聚四民之處秀材生焉卿
士安焉於今與州縣並稱慧夫往爲之師宜盡心焉錄
朱子以來其師弟子扶樹大教修孔子之道人之仰之
如日月出與俱出入與俱入令家誦戶蓄其書誠得師
爲論繹朱子之說使曉然覺寤功必倍矣吾前舟過青

龍河見大屋在北林中有美衣冠三四人徐行過柳下
爲將入者余憶之曰何巨家以今言則其學宮也聞學
宮有唐宋石刻諸詩詞悉如外史所詠此可游也慧夫
何遲遲至正四年十二月十九日永嘉李孝光季和序
青龍江上古儒宮子去橫經作士風當戶九峯春樹隔
去家百里海潮通華亭好事籠盛鶴楚刻名碑篆剝蟲
信是青衫如拾芥辟書已在薦賢中 句曲外史張天
雨

解道詩成泣鬼神錦袍未負謫仙人隨時俯仰何奇士
值世承平只幸民醉卧惟餘青眼在交游莫擬白頭新

客來異縣亦近耳得此斯文肺腑親

余客游婁縣與瞿郭盧呂諸君日相從爲嬉游登山
臨水飲酒賦詩五六人者無不與將去婁又和此詩
爲別至正五年正月八日永嘉李孝光季和父在海
寧東齋書

往年客婁縣適瞿君慧夫將上青龍鎮博士諸君皆
賦新詩以送之使予爲序後四年復過婁視所爲文
但覺蕪陋耳至正八年二月廿五日孝光題

丈夫求仕非無術只合明時作校官弟子日來供茗飲
先生時坐取琴彈澱山春樹簷前綠谷雨秋風帳底寒
善舞不須愁地福才名行且屬儒冠 勾吳沙門釋善
行庚寅十月廿七日

獨坐高堂對春雨碧梧飄濕鳳皇翎已瞻百里陪郎宿
尙許孤槎載客星把酒長年惟覓句焚香終日只橫經
我來十 今朝醉一笑逢君眼倍青 至正庚子三月
曲江錢惟善書于嘉禾邑庠敬恕堂

仕宦去家百里近文采照人當妙年想見彈琴讀書處
牆頭春日薺花圓

江上春風日夜催卽看柳色上衣來莫言美玉難酬價
定有黃金爲築臺

人生豈必相逢早異縣傾心有弟昆却恨客舟無意緒
預先載我出吳門 陳惠永叔夏

闔閭城郭東海近滄江正爾連吳淞只消放船七十里
不用過山千百重學子衣冠皆濟濟先生事業豈容容
媿予白首成潦倒春風安得此相從 會稽生王冕
公道 真賞清詩見似人衰年只遯跡今日解傷神浩
蕩龍江曉淹留雁塔春心期渾未卜秋夢已頻頻 京

兆梁恂

彥明王先生爲予言慧夫青龍教諭時已嚮慕且出
示張伯雨李五峯所贈言伯雨故交李與余生同六

今皆不存覽之愴然爲賦此詩

聞說瞿文學與交皆偉人曹劉不可作張李故相親已
脫塵中鞅猶存席上珍才名元振厲詩語特清真顧我
何晚思君妙絕倫平生五經笥他日半通綸小試衣
冠椽終期科第臣芝蘭居輒化薑桂久逾辛孟浩吟
苦虞翻相本屯風雲同律呂時序異參辰有恨月初夕
無言草自春能忘正云晤搔首暮江津 句章黃玠

送瞿君慧夫上青龍鎮學後序

夫位卑而責重賢者不患其位而患其責不患其位故
無諂諛以求進患其責故無廢官而怠事不賢者則反

是矣吾友瞿君慧夫爲青龍鎮學教諭知慧夫者咸曰
教諭下初命之士一等其位卑以慧夫賢而多才非所
宜居余因解之曰教諭固小官也在學校其分則師也
吾見其尊未見其卑也峩冠大帶坐之堂上口誦詩書
禮樂以造羣士務使人人抱道執藝小大成器緩急足
賴爲用其責至重也賢者之心盡吾責而已矣夫庸校
其位之崇卑哉不知青龍掛籍凡幾戶能爲士者凡幾
人吾聞吳淞大江出其旁地氣清淑必其間多秀民知
讀書向義願爲弟子員待慧夫之來唯恐後者慧夫往
焉絃歌之聲聞于鎮間他日吾亦往求吾子而樂觀之

昆陽鄭東序

送瞿慧夫青龍鎮學官二絕

山雨蕭蕭夜轉多思君別後定如何帷犀怪底時時動
池上東風生綠波

雲影垂江護晏陰題詩東閣曉寒侵便須騎馬迎君去
街上青泥三尺深 呂肅

贈畫師朱叔重敘

論畫之工者于昔代有其人而今之世尤盛始國之初
興才人輩出禮樂文物炳炳爲一代典章者萃然于其
間畫居一也時翰林大學士魏國趙公房山高侍郎李

金縷珠卷一
三
薊丘商曹南諸大老稱首數公皆世巨儒聰明才辨動天下而身館閣近清光其所目擊莫非奇聞異觀又其胸中復自涵容大川喬嶽之不可測識者故形諸筆端點染紈素則必怪奇雄特深莫知其所自高莫瞻其所入千態萬狀一舉而盡之宜其名世傳永無忝也厥後嗜其畫者或私淑諸人或臨摹想象遂以升堂造域者常常有之而南方最多吳朱叔重氏其尤也叔重儒者而工畫每一賦詩得模寫之妙輒肆筆繪之極詩詠之工嘗曰王右丞水田白鷺夏木黃鸝之詩卽畫也而李思訓數年吳道元一日其工夫學力所到者畫卽詩也

庸有二乎夫吳人固多善畫者往往泥于毫素之末以之資生以之餌名畫雖工不過爲苟取之具而已君子奚取焉寧取夫所謂翰墨遊戲者若叔重是也其衣褐其冠素其足跡未嘗遠游其身未嘗仕于時名雖稱于薦紳士大夫而未嘗赫赫得時譽飄然其舉紛然其居與時世相浮湛若不異乎庸衆人者而其賦乎天者醇其才清其智明至發之繪事有自然之妙或者其胸中亦自有以 之不可測識者與人不得而知也古之人游于藝者以小物不遺而動息有養也苟有養也則游藝不爲末矣又况風流醞藉如叔重者乎吾將見其名

世傳永無忝矣鄧君恒持卷俾桓以言贈叔重桓辭不能弗許因敘述其所以復之是爲贈至正十五年三月廿又五日大梁朱桓書于中吳旅舍

婁東朱叔重滿卷畫雲烟過越乘山轎歸吳放野船危峰蒼鶻上遠樹白鷗前每愜幽尋意題書爲爾傳 虞堪

朱子耽詩畫風塵空白頭神令運筆速力與扛鼎侔射虎石飲羽刺山雲迸流嫩嵐媚白日爽氣澄素秋慰我烟霞想見爾珊瑚洲何時乘大舶沉以鐵網收 呂敏良工繪理善丹青萬里江山方寸生老樹蒼松乘筆興

顛厓怪石令人驚浮雲冉冉看若動流水潺潺聽有聲我欲登臨游古剎危 蒼松老人錢伯

朱公之畫清且奇巖崖嵒嶮高秋時興來落筆雷雨垂醉中飲墨來天池當時策策西風急萬木槎牙皆特立寒凝翠疊只尺間夜半尙疑山 李成不作俱假名平遠後來惟道寧如公水墨非畫者觸熱對之雙眼明 錢元善

婁江有客朱氏子解畫丹青稱畫史鮫綃一幅淨如水溪山樹石生筆底元非丘壑在胸中安能經營作佳製便當舞劍助揮豪翰墨人間恣遊戲 南陽野客邵復

有初父

念子高居水屋寬每將圖畫想衣冠墨池雨潤秋雲濕
海嶽風生玉樹寒萬里幽微來眼底百川平遠出毫端
安能脫得塵間鞅着我扁舟把釣竿 吳門李 伯彰
揮豪落紙妙通神筆底自有無邊春他日丹書九重下
肯將巧思畫麒麟 延平吳昞

秋風蕭蕭吹短髮十年東游作行客青山茫茫幾十里
飽看自能忘柱笏欲求負郭二頃田誅茅且侍終南澤
歸來一身倦行役俛仰城市殊偪仄胸中愛山那可忘
每抱幽思記行跡婁江朱君名畫者爲我丹青時一寫

眼前態狀寫奇特

導西林獨歸馬參差遠樹生鬱葱

鳥道幽分入平野九州壯氣凌太空中有飛龍逐雲下
筆端磊落皆宛然六法縱橫遍瀟灑江南三月春雨多
桃花水暖揚微波買舟載酒不歸去湖邊醉倒逢狂歌
畫圖咫尺勝如許抱琴坐對長吟哦只今烽火苦未息
况聞南北徒干戈不妨歸計養朝夕一丘一壑終如何
毗陵安敏書于鶴林精舍

海嶽菴頭積翠峰蒼松兩兩似游龍要知米老騎鯨去
誰把雲山寫澹濃

朱郎絕似大癡哥丘壑胸中寫更多我欲攜琴訪猿鶴

白頭相與卧松蘿 灌園翁顧敬

落筆山雨至客樓生遠思風流朱叔重不似虎頭癡
倚柁寫秋色曹娥江上頭樹 連塞雁天影落沙鷗

錢唐徐恒

畫圖只數李將軍風致流傳恰到君登樓十日人罕見
寫盡江南萬壑雲 高恒吉

吾邦會稽山水府萬壑千巖如米聚平生癡絕顧虎頭
道中應接亦良苦至今清響若耶溪童子山僧惟杜甫
近代乃有高尙書時過雲門吐奇語麥秋天氣小籃輿
移將長松在縑楮高標遠韻不復見寂寞溪山但風雨

朱君叔重吳下來示我小圖雲一縷乾坤秀氣皆可得
李郭董米開門戶林稍出沒烟霧中山谷隱顯帶洲渚
江南生意半 天真平淡此爲愈君誠破筆書萬卷
魏國風流敢相許如何叔重心好古布襪青鞋獨艱阻
明年須償司馬約綠水青猿宿天姥老我尙堪歌勝游
藝苑詞林期一補

至正十五年九月十四日會稽山樵元澣書 元鏡

贈筆工沈日新

玉翁灑翰唯馮須製法授以柯山徐當年松雪所親見
故使穎也能馮如擇毫審固用工久楮白陳玄駿奔走

若馮若陸真可人俱是文場劉輪手沈生晚出亦舊家
恥將秋菊爭春華南洲佚老重題品不日聲價十倍加
耄我雲山倦文字爽氣挹來那有思一枝持贈焉用之
殊異江淹夢中事

宋季太末徐信卿筆名重搢紳間玉溪尚書趙公以
徐製法授馮應科俾之日縛一管不合意卽拆裂復
爲之必如法乃止松雪公乃玉溪從子嘗親見其事
故以此法授之陸穎馮陸齊名實本于此南樵張復
亭

獻賦長楊人又去試呼毛穎卽稱寃烏犍三百何時足

欲老江南烟雨村 甲戌春中沈生持筆過余有感而
作 三山林附鳳

吳興馮筆妙無倫近有能工沈日新倘遇玉堂揮翰手
不嫌索價似珠珍 杜本伯原

沈生筆妙能隨意曾記蓬萊應制時三十六宮花漠漠
玉階研露寫新詞 五雲閣吏柯九思

南州先生真玉人蘇家季孟世絕倫良工騎箕上天去
先生餘不溪水濱東老之家酒熟未其孫猶以縛筆聞
公家兄弟不負筆我輩禿之天且嗔不如醉用榴皮寫
仙人豈亦能書者 遂昌鄭元祐

錢細珠卷一
吳興筆工沈日新出馮陸之後製作頗精惜其不得賞
鑒于翰林主人而徒爲我輩不善者之所識也然涪州
用三錢雞毛筆游戲蘭亭三昧此又何耶元統改元季
除前三日燈下試染散卓愛其轉折可人因題卷中柳
貫道傳父

我聞善書須擇筆千金求買嗟未得何人縛兔中山來
褐衣猶帶山烟濕西風颭颭吹霜毫快利入手如銛刀
寸鋒一日空萬紙暮鴻作陣邊雲高鍾王不生書體絕
俗筆誰能辨工拙無人致之白玉堂贈我空山書落葉
李坦之

王氏彝齋記

古之君子所以貴乎故家遺俗者豈特其名稱也哉其
文獻有可稽其支胤有可采其傳其授有可法可考夫
若然者要豈一日之積哉宋渡南諸帥臣以功名顯者
固不一若王襄愍抗節以死於苗劉之難賜居義興山
中其五世孫覺軒先生宋亡後以文儒起家官至蘭溪
州判官當盛年便歸卧荆溪之上蘭溪君之子子敬父
與其昆季仲德父子明父皆能力學以世其家文獻之
傳有可稽可考重以三昆季博洽以考索嗜古而識精
于是其家書傳子史百家之言三代兩漢尊彝鼎之

器六朝以下圖史繪畫之屬象犀玉石製作之粹在人代有一二物猶可哆然自足若蘭溪君之家殆所謂如行山陰道中千巖萬壑使人應接不暇向三十年前其里人岳漢陽與君中表親戚予嘗從漢陽登君仁後堂所見歷歷固已若此今更一世其所增益必且百倍於昔時方泰定間予敬父當無恙歲朝禱籤于大神之祠籤語有謂當獲古鼎是年果得商父丁彝于雒陽夾谷之家夾谷初不識爲彝弟謂灞陵橋下出于漁者之網罟彝大容一斗重十斤其鬱發而爲文章雖五采爛錦不足以喻其菁華其模鑄之藻思雖妙畫重複不足

以喻其巧神子敬父旣得之則大喜以爲大神籤語靈貺若此至合海內博識之士觀之不獨推彝爲三代銅器第一且盡讓子敬父之賞識爲不可企及云未幾子敬父至正十二年距父之二十餘年矣是年傳聞寇將犯浙西子敬父之子令顯字光大乃謀于其二父載資以自隨必爲資所累固莫若窖藏之而盡室以避去光大尤念彝其先君子之所識賞乃沉彝于園池之深屏處夜間池中有物怒吼殊訝之于是出彝于水寄之他處比賊退視所窖藏與其萬金之資千柱之室皆燔燬掘鑿無一存者而彝也乃獨巋然獲存夫光大

之先君子禱籤于神謂獲古鼎而是年果得彝固已神矣晏然太平之世豈料變起倉卒哉急迫之際沉彝水中而乃怒吼以規免于盜賊之手由此言之彝之神不可泯沒無傳也已案史傳商諸帝有沃丁中丁武丁祖丁庚丁太丁若父丁則未之聞也夫獲父丁彝尙足以裨經傳之缺故歐陽公金石錄每謂古器物銘款多可以證定譌缺是于世教豈小補哉光大念其家故物無一存者獨彝爲先君子所寶愛于是遂以彝名齋夫王氏世澤之醇彝能神之爲之兆是相與永久無窮也必矣作彝齋記遂昌鄭元祐

客居北渚靜窺臨霜藻蕭蕭雪滿簪玉石在山聊混璞金蘭惟子久同心每懷往事 今事莫棄分陰惜寸陰自笑蝸廬無長物牕前陶器與單衾

長至後十日蓋十一月十日也獲與德機伯昂二高尚公董伯充二賢良共詠彝齋有道先生見貽佳製絕歎敦厚優柔得唐人句法宋諸老性情也張高尚命卽次韻奉和書紙尾所謂以狗尾續貂多見其不知量也恕之幸甚是歲乙巳倪瓚再拜

張簡沈右詩

長句一首寄上叔方先生求賜之教 張簡頓首

盧橘花開梓樹疎故人安穩在樓居翠眉狎坐春行酒
絳帳懸燈夜讀書未必醉來忘簡寂祇緣老去尙高虛
離羣應念賃春者道遠天寒欲命車

敬次叔方先生見示詩韻 右頓首上

城南陋巷居新僦綠竹移來幾箇斜叢桂山中招舊隱
讀書堆裏認君家蜀人謾詫文園賦吳市爭看衛玠車
斷簡味腴如啖蔗虎頭癡絕至今誇

右顧仲贊
移居詩

步屨春風裏翛然忘世情閒門無客到載酒泛江行雨
過山如染潮迴水自生鷗沙割千頃夢不到承明

右留
笠澤

別業詩

右頓首拜啓十月望過吳江別業得所惠書者三光
景如過駒隙僻居江村况味寥落東流活活悵望送
清晝耳比日來計體道廸吉右萍梗之暇每懷相從
聚首實迫以歲計未免以淹遲數日須至節前可歸
相會有期已篆書千字文留此多日乞恕臯稽之臯
嘗因親戚會讌爲酒所困終日憤憤近者始覺神清
尙欲借觀數日決不爲寒具油所澆呵呵

中酒雜詩四句五首

中酒如卧病天寒露爲霜東軒候朝旭曝背屢移牀
江頭風浪急舟小力難勝一槳歸來晚長林月已恒

太丘海岱士肆情丘壑間考槃詩賦罷采菊對南山
歲閏寒猶薄風迴水自生杖藜隨小步極目大江橫
朋酒享公堂農家盡滌塲縣官薄稅歛田野足耕桑
右拙詩僭易呈上併乞裁正茲因端便勒此具記不
備右再上叔方教授先生

次韻叔方先生五言律詩二首兼簡伯行敬初發一
笑

憶昔陪二子吟嘯野亭中風急江花白霜晴木葉紅去
留身若寄陶寫興無窮更喜陳夫子幽尋訝許同

掩卷嗟忘寐書燈耿獨明年華勞髮改夜氣與神清感

夢疑蕉鹿逃愁賴麴生何時重相覓握手話真情

叔方先生過詠歸亭賦詩二首以志盍簪之喜 沈

右上

短棹相過莫便回詠歸亭上且低徊升堂拜母稱觴後
隔竹呼童瀹茗來八尺駝尼分紫錦一雙蠟屐破蒼苔
空江草木雖搖落猶有寒花帶雨開

積雨空林喜報晴杖藜隨意傍江行天寒木落青山出
日轉沙虛白鳥明謾擬東林時釀黍自憐南畝晚歸耕
穎川高士能相過閒把瑤琴膝上橫

東林薄酒試新嘗中有松花膩粉香遣送穎川陳有道

書齋渴飲勝茶湯

廿八字借一壺薄酒奉寄上惜不多耳楊誠齋文藁
不曾收得所謂芍藥屋疑只是用幄轡覆護者古人
稱牡丹爲木芍藥白居易有詩云上張幕屋瓦豈亦
本諸此未審是否更乞考正之 右再拜藁
慎獨先生座下

王昉詩

倪瓚二帖附

昉拙作數首錄呈

叔方尊兄施郢斤是幸

早春十詠

春日流熙熙朱光射屋角晶熒動几案焜燿穿簾幕淑
氣襲人溫輕寒側衣薄晴牕坐來久益背真意樂
東風生庭隅拂拂翻衣浪仁及紅綻柯德布綠回望芳
情達金閨誦聲遞書幌池塘溢波瀾柔條欣駘蕩
江梅獨清高不與花爭發自是冰雪姿豈受鉛華奪故
來風雪底玉人相感頷照水昏黃時孤標更超越
依依垂楊柳青眼窺陽春年年郵亭路攀折送行人臨
風攀翠縷映日鎔黃金如何不自持飄揚逐芳塵
蹁躑先春雀風暖喧晴簷驚人鮮得食矚堦無停瞻不
趨太倉中小腹恣屬厭高秋寒露下大水須深潛

春流溢芳塘倒影開天鏡漪漪綠生漣漾漾玉澄瑩閑
鷗可尋盟游魚樂行泳清斯清濯纓鑑心鑑其定
鮮鮮牆根草春染千堆籃光凌青袍色夢入新詩譚胡
馬思塞北陽春辭江南欣然鬱吾日生意性所耽
提壺勸客飲布穀催農耕農耕困耒耜客飲酣簫箏勞
逸分已定興廢時改更物生固如此天運還循行
朝來睡未足兩眼 眇昏春事已爛熳我懷獨 渾驥
尾不可附虎舌誰能捫芳塵困涸轍北溟思鯨鯢
天公妙莫測百卉巧剪裁朱朱與白白脂粉如勻腮澤
沾無遺物燒却綠回萋痼陰少成實涉山乏良材

自遣

江湖肆鯨鱣溝 難容身人情不干日世事有兩心朝
暮有顯晦日月常升沉天道我欲問其理幽且深
生成無根蒂飄忽寄此身顧盼絕青眼相交少赤心芝
蘭棘溷發泥沙玉空沉乾坤信浩蕩滄溟千古深

放慵

愁到心常結事過心自涼幽憂漫成疾慵放且何妨籠
鶴聲難出牀龜息穩藏浮生付天地澄慮博山香

晚思

薰風向晚急吹動一身愁意合情終美心離事只休鳥

衝殘日度雲逐暮天流今古無窮恨令人早白頭 王

咏頓首

瓚頓首再拜慎獨有道先生執事瓚久不上問惟是懷仰之私無日不動秋氣涼冷不審何似伏惟隱居求志教授鄉里有下帷談道之樂神相德人百福萃止欽歎何限瓚七月末忽感癘下疾兼旬乃瘳近尤憊憊耳恃以道誼之契輒有浼瀆養正一子八歲矣使知所趨向以爲禮義之歸不可不慎其始也養正賢母子熟聞其先公誦歎其德美之盛願闢私塾以俟杖履之臨寓所謂河潤九里者非但小子蒙福也未敢冒昧以請俾賤

者敬致一言于左右能俯從其私情幸甚詳曲當別奉書以聞就此月到館中爲便也僭越上溷高明惟有悚恐仰冀恕亮不備瓚頓首再拜海岳菴圖旦晚臨摹畢卽全璧以歸也酒二大尊漫上九月二日瓚又空

瓚再拜奉書慎獨有道先生執事霜寒伏想尊履清謐養正冒昧選取今月十八日闕私塾招延先生講授其中謹預於十三日敬致少幣禮於執事者至乞領意幸甚不及作啓陳情惟委恕焉不備 紵絲一端 羊一

牽

準銅錢一定

果一筐 酒一甕

友生倪瓚再拜

周砥詩

絕句四首奉答惟寅高尙見贈 勾吳周砥再拜
誰識元方趣高居湖上山詩成不求賞獨詠兩松間
感子相存意蘭章繆見推何因石牀月同擘薜蘿帷
列岫供秋色遙風散水文明當思舊隱歸權一川雲
直方非任世寡默自爲身養道窮山裏何關習隱淪
八月廿一日寫
野花疎竹媚幽姿翡翠簾前雨散絲最愛陳琳詩句好
玉盤春露捧金芝
秋來長掩竹間扉過客誰能識道機慚愧廬山陳處士
時來共葺薜蘿衣

晚風吹雨過林廬柿葉飄紅手自書無限蕭條江海意
一尊相對憶鱸魚

八月廿一日惟寅徵君踏雨過林館爲留終日因誦
近賦絕句三首愛其辭致清婉輒走筆次韻如上古
道寥寞人以角逐聲利爲務惟寅獨逍遙恬淡之鄉
時來 之篇章翰墨之事豈易得也哉周砥

潘牧詩

至正辛丑冬惟寅先生以懷古十二詩示僕讀之有
古烈士慷慨悲歌之風當時大夫士和者甚衆僕亦
忝居契家之好故敢次韻成章鄙俚可笑非敢以言

詩也謹呈求教契生潘牧

吳都富且豔翠袖倚層臺鼓吹凌春色旌麾駐越來繁華忽消歇珠玉風中埃

青山瘞寶劍草偃千秋墓金鳧入夜飛玉漏沉寒露轉盼陵谷遷非從鐵爐步

勾踐嘗膽日堅銳不謂無一朝獻西子越兵成大呼回睇長州苑千秋生碧蕪

青山翔鳳皇紫氣繞吳關玉泉湛若鏡靈鷲飛不還重瞳在何許淚灑莫能攀

翠華竟南渡夷門不復都長城乃自壞黃龍孰能屠空令二宮泣五國聽啼烏

尚父擁玉節錦衣當晝行輝光照閭里千載英風生至今牛斗下還瞻紫氣橫

懷古六詩謹次韻錄上

汝言呈

弔古上靈巖日暮下琴臺蕭蕭紅葉落采香人不來鴟夷稱得計勾踐亦塵埃

吳宮事已遠王詢宅亦無山鬼話亡國松關夜相呼白露泣紅蘭青燈照碧蕪

荒丘壞古隧言是孫策墓墓草生輝光零零泫清露想當立國時英雄稱獨步

南渡中興日君臣此建都共憤太宰讒子胥忠見屠武
穆何由死欲聽延秋烏

國亡喬木在烏鳴自關關人隨歸雁遠春從沙塞還怨
別惟宮柳長條復誰攀

山僧講經地玉輦昔曾行寢殿野花落空巖雲氣生敗
亾猶得士千古讓田橫

畫沙錐贈陸穎貴筆師序

有詩

吳興陸 有才學而隱于筆工其仲氏穎貴美髯善
容止尤有才氣可仕亂世而識幾不受聘則慨然曰以
弓刀竊祿孰愈吾世守毛錐之爲貴也襲名穎貴而製

之精者標其號曰畫沙錐尖圓適健可與古韋昶爭絕

晉人

余用筆喜勁故多用之稱吾心手吾書亦因之而

進穎貴亦自貴雖勢要求之而不可得別襍之以錦署
曰非會稽鐵史先生弗能知宣州諸葛氏云柳學士能
書當留吾筆否卽退還未幾果退還歎曰代無右軍何
以用吾筆而穎貴欲以吾當右軍惜予老矣所書今不
過山經野史汝錐之功無以用之以利天下徒爲祝錐
辭於乎錐乎錐乎其勿取晉典衛之所叱乎班虎頭之
所躋乎縱弗過也其深閱毛先生之囊乎慎勿爲李鑛
兒挾貨以尋竇于王公貴人之門也穎貴卓然起立抱

鐵網珊瑚書品卷第七
襍退拜爲錐叟曰代縱有祖范陽之神錐吾錐不得易
摧矣龍集巳酉秋八月初吉甲子鐵龍道人楊木貞氏
在雲間之拄頰樓試畫沙錐染奎章賜墨書 詩八韻
在別紙爲海雪生所奪再書于龍虎山白籙小素

鐵網珊瑚書品卷第七

終

鐵網珊瑚書品卷第八

吳郡朱存理性父集錄

辨烏賦

蹇我生之不辰兮遽遭家之多難痛堂上之護萎兮交
摧戕于肺肝陟屺前而悵望兮曾白雲之漫漫蹈九死
而一生兮存喘息于已殘勉行營于高燥兮卜壤夏之
所安朝旣亡于蜚鶴兮莫敢晞于栖鸞俄潛闔之載局
兮政除月之隆寒紛紛提之令烏兮翔童童之同山惟
二三其柔桑兮僅短短而可攀誰知彼之雌雄兮忽駢
棲于其間亟營巢而莫去兮曰夷猶而盤旋銜壤而益

鏡新瑤苑卷八
墳之楸兮載上下其修翰獨傍廬而感慨兮潛涕泗之
汎瀾謂蒼蒼之蓋高兮亦莫探其端也豈期衆目相與
駭矚風行而電馳道路之相譁也儀談而秦辨聚落之
雄夸也金相而玉振衆芳之聲詩也嵩岱峩峩而萬疊
友朋之高義也差不謀而相埒兮觀古而驗今日爲至
孝之感兮覘瑞應之圖而有云况顯名于孝烏乎亦或
謂之善禽撫北齊之蕭兮李唐之林列巢門之順兮棲
冠之參舖張虜裴之表門兮鈎索虜之孝心申申虜
銜塊以助陶兮又還觀而南尋迨天使之口流血兮庸
顯顏烏之誠忱僉曰昔聞而不見兮固可紹往哲之徽

音吁嗟予小子曰不然兮猶足以理而言兮何山顛不
爲烏所集兮何林間不爲烏所巢兮孝性之修亦士之
常守兮事物之來亦有時而適然兮何足詫也瞻彼鸞
斯實名維慈予垂反哺之訓公興孝養之辭嗟彼能而
我不逮兮懷乎風木之悲矧哀哀而蒙酷罰兮豈嘉祥
之可希復俛俛而昧所 兮何前賢之可追意夫剡剡
而章厥罰兮俾悠悠其孝思維此理之忽然兮又孰較
其是與非嗟夫子小子不可不辨兮恐來者或失其是
銜損其心而泥其跡兮斯去古而益遠于名教而或戕
兮豈清議之可追眷里閭之嘉言兮特君子之樂善賦

以揀將來之弊兮亦豈夫子之好辨

右辨烏賦一首宋丞相雍國忠肅虞公之所作也紹興六年公丁母秦國太夫人之憂哀毀骨立朝夕哭墓側墓有枯桑兩烏來巢悲鳴不去人皆異之以爲篤孝所召多作詩頌之公因著賦以自解此公家傳之所具載者也公之八世孫堪適遭父處士君之喪出此賦見示且俾書揭座右達以爲故家文獻尚存詩書之緒不墜因樂爲之重錄云至正十五年冬十月甲子彭城錢遠謹識

笠澤爲虞勝伯創義塾序

古者先王之于民也有養焉有教焉邑居而井受薄其賦稅是故無甚富甚貧之民家塾而黨序申其孝弟是故多成德達才之士降及後世兼并之力勝而賦稅日繁學校之實隳而異端並起士有被服仁義誦先王之言者居無卓錫之地而浮屠氏之宮擬于王者金碧窮于土木而士不飽粗糲噫爲今之士亦難矣尚欲空言之排之哉上之人循習其弊之久苟非命世之才不足與有爲也獨恠天下之人愛其子延師而教之或較錙銖于朝夕而不吝夫千金之施于浮屠以徼福夫士以仁義忠信之言訓其人使入以事其父兄出以事其長

上以保其身以光榮其祖宗其爲福莫大于此彼浮屠
氏寧有是彰彰其著明也哉而昧者作罪于旦旦求福
于冥冥而卒不獲其報何其性習之相遠而迷惑陷溺
之深也往時閩人詹景仁氏買田築室延京兆杜伯原
父爲之師以訓其子弟其詹之子弟被伯原之教族日
顯以大賢者之有益于人如是斯所謂楚然足音曠百
世而一遇者也自時厥後蓋以寂寥而無聞矣在昇平
時尚然况喪亂之際乎予留中吳識故宋丞相虞雍公
八世孫曰戡字勝伯于元故侍講學士公爲從子學博
而文行修而篤雖于今爲庶尚論故家文獻其流風遺

韻有足徵焉其爲人蹇蹇有志節不交譽于當世奉其
母避地笠澤之上以其所有淑諸其人庶幾世濟其美
者予誠私心愛之間二年予亦以親故從事于升斗之
祿有茗城之役而勝伯足跡不一至城府竟不知所造
詣爲何如也今年春余謝病得請方外友鄧君青陽自
笠澤來問疾青陽隱者也能知賢故予首詢勝伯則言
其學日加富而家日益貧至無所于居且將有它適予
愀然曰笠澤唐陸魯望嘉遯之所也魯望遠矣其族有
曰德原號靜遠者嘗爲甫里書院以居學者今去靜遠
之時未久也以予勝伯之賢而其子孫無有能從之游

者則陸之家其不已替乎得不有聞陸之風而興起者乎青陽又曰有施縉彥紳者陸甥也賢而勇於義慕勝伯之爲人欲爲義塾以居勝伯使鄉之子弟皆有所矜式以力之不足思與鄉之同志者共圖之而未有因也予復喜曰世復有斯人乎勝伯之於出處去就其審之已久其塾之成與留舉不足爲勝伯喜竊獨喜夫彥紳之賢而能知所本也今夫一塾之費視浮屠氏之施特萬分之一而其效乃能福于其鄉豈不爲世道勸哉孔子曰見義不爲無勇也傳曰有志者事竟成吾知笠澤之子弟又將服勝伯之教亦日顯以大使閩之詹氏不

獨專美于前矣然詹氏以有餘之資延伯原爲易施氏以不足之力奉勝伯爲難然能假衆力以成之則若反有易于詹氏者吾猶恐夫勝伯之不久淹于此也爲我謝勝伯曰笠澤之人厚于子毋有他適以孤其父兄子弟之心明先王之道以道之使化行于其鄉吾于子有望矣輒書其言附青陽歸以厲于施而速圖之以明君子成人之美之意其有樂于義者著于篇至正二十年冬十月會稽姜漸序

興義塾以淑後學斯文風化有幸也有力者優爲之人以爲難施君奮義而欲爲之其難可知已在承平時爲

金剛經疏卷八
五
之人以爲難矧搶攘之際而欲爲之其難又可知已非
諸賢扶翼相助斯役何以克底于成哉蓋不獨以喜于
勝伯虞君而實有關於斯文風化也吳客趙郡蘇大年
伯昌齡父書

縉自早歲侍師彭城錢先生之獲交于先生之友蜀
虞勝伯先生于今十有餘年適以世故艱棘勝伯乃挈
家于笠澤相與居處相交之久益見其學行之高明守
處之端確故凡子弟樂從游而多被化者誠有道之士
也縉竊愈加敬之念欲買地築室以居勝伯鄉里子弟
得有以受教而卒成其業奈艱于力之不逮故因循而

未能也今年幸逢時康歲豐之秋而勝伯又將有宅適
意噫吾志果不足爲乎昔者管幼安適遼而遼人化今
吾鄉固非遼也而先生之道仁義忠信之言有不可一
朝夕而不之講者向之子弟何飽暖而多不知教其弊
反有甚于遼之初者矣蓋雖知學之始而不克遂于其
終耳今勝伯一來而從游者衆是知學之爲要殆將有
望于成而勝伯廼猶有難于處而將去之又半途而廢
之是重可惜也故縉于是願留勝伯爲義塾以居之使
鄉里子弟終賴勝伯之教以敦厚其化庶幾爲將來美
竊念縉力之不足不能獨成焉蓋深有望于鄉之諸

金縢班班卷八
六
賢相與共爲之則斯舉之成不難矣然非縉之私也實
吾鄉之盛事也敢書此以請至正二十年冬十月吳興
施縉書

送虞勝伯序

故宋太師虞雍公以雄姿偉略佐宋中興出入將相垂
二十年其經國大業之著於章疏忠貞氣節之形于奏
對太史氏所錄蓋班班焉有志之士聞其風者猶足以
興起而况覩其全書者乎其書舊刻蜀中已而燬于兵
四世孫通判寶慶府君將復刻之湖南弗果五世孫叅
政當國初猶篤意于此會故人眉州史孝祥守興化聞

黃伯固家實有之求之不能得至六世孫學士遭逢盛
際復以文章致位通顯其侍書奎章閣時嘗屬閩校官
謝中物色之中至閩適閩武官有購得之者將資以見
學士未幾學士歸田里尋捐館舍自是書存亡無復以
爲意者已與予友者曰戡字勝伯於公爲八世孫一介
布衣困窮無聊自勝伯以上居吳吳子弟與勝伯儕輩
者往往歛棄筆研不屑事父兄書自負以班仲升者無
慮以十六七否則亦竊自緣飾爲公孫子不成其弊猶
足以舞文巧詆與鄉里少年爭長雄勝伯之計顧不出
此獨折節以紹隆家學經紀遺書而已間聞松江俞子

中爲吳理官時得其書于魯人賈景莊氏將覘往求之
斯行也天其或者未喪斯文乎吾聞之君子之澤五世
而斬勝伯去公八世矣斯文也猶將賴勝伯以弗墜韓
愈氏有言莫爲之後雖盛而不傳勝伯所謂善爲人後
者非耶于其行吳之能言者咸賦詩以相之屬予序之
至正十七年冬十月乙未臨海陳基序

送虞勝伯之松江求先雍公遺文

川谷沄沄逝水波雍公勛業未消磨况當異代求文字
尚有聞孫校舛訛京國不聞收汗馬草萊終見沒銅駝
誰陳聖主賢臣頌奈爾陰山敕勒歌

虞勝伯徵君隱居行義居甫里垂二十年不以姓名
求知于時之聞人道園先生其從叔祖也先世雍公
遺文道園先生欲求而不可得勝伯必欲以意購取
之可謂有志而不忘其所自矣聞此書藏松江俞子
中推官宅推官歿已久而子俊州尹其弟能假以歸
勝伯非仁人義士之存心乎州尹吾故人也因書以
爲之請陶蓬大尹見之當有以教我也倪瓚

贈虞勝伯序

宋丞相虞雍國忠肅公其八世孫堪勝伯請于遂昌鄭
元祐曰先丞相有大功大德于高孝兩朝其行事章章

槩已著乎信史始終本末要與唐裴晉公齊名若夫言語文字特先丞相立德立功之緒餘然有德者必有言丞相六歲誦九經七歲能屬文已而登進士第累遷官南宮便已悉完顏亮之奸詐和議必不可久及亮渝盟傾國南下元臣夙將多殞于權奸丞相方叅謀江淮軍事乃能以忠義激勵將帥遂成采石之功當時劉四廂至謂朝廷養兵三十年而今日大功成于一儒者我輩媿死矣已而出將入相以身繫天下安危又何必言語文字然後增重于丞相哉然有德者必有言則先丞相遺文集錄若干卷先叔祖侍講來東南念文集不得所

至購募皆不可得堪也近見魯人賈景莊言其家舊藏丞相文集今轉致于松江俞氏家堪雖貧將哀鳴伸訴懇欵以言之悉力以求之庶幾歸之堪俟時平定復刊諸梓是丞相立德立功立言併爲不朽元祐案國史雍公嘗注唐書五代史藏于家又有詩文十卷經筵春秋講義三卷奏議二十三卷內外志十五卷行于世富哉言乎三代輔相功德與文章並傳萬世者惟周文公兩漢以來知名宰輔以德以功煥映竹帛者亦多以言語文章爲緒餘至唐宋乃始兼有之然傳之者蓋亦甚寡向年侍講公以文章知名海內求雍公文集而不可得

金縷班班卷八
今勝伯乃能求之于艱危困苦之中斯其志過前人遠矣昔孔氏壁藏其家書一時雖斲晦更久復顯列于學宮然則雍公之所著錄得賢子孫不至湮沒要皆本于立德立功云至正十八年春元祐造 江陰張體書

虞君勝伯求先世遺書將鋟諸梓作詩以美之

前朝雍國虞丞相學有師承道有源采石勲名昭日月淳熙德業振乾坤陰功久著更生佛家學今傳八世孫力購遺書喜重得還令海宇誦名言 吳郡沈右

丞相遺書何處收百年世事迥添愁曩聞西蜀曾傳刻今喜東吳得購求文獻一朝徵舊典精誠千古煥嘉猷

成都豈有桑田在最愛仍孫學業優

吳郡呂禎

雍公文字秘深幽夜夜神光徹斗牛盛代固知傳不朽賢孫今喜往相求江風百里松陵雪事業千年采石舟驛路蕭條送君去中興謾說使人愁 勾吳周砥

雍國勛名照古今遺文誰爲重追尋鬼神呵護風雲繞金石摩挲歲月深坐待明珠還合浦行看寶鼎出汾陰公家今有賢孫子江漢滄浪萬里心 鄒奕

雍公文集世珍藏夜夜雲間光燄長縱使千金收蜀本也應全璧出俞莊雲孫異代云何切閣老重泉志亦償此日誰爲宗社計如公安得寘巖廊 豐城俞詮

雍國多孫子如君已獨賢
傾囊看舊物求友訪遺編
聽鶴雲間路烹魚泖口船
遙知滄海月中夜爲君圓

魏文彞

秉中

雍國中興相清名尚凜如遠孫
居異代先世有遺書似是鬼神護
猶存兵燹餘斯文真不朽字字比璠璣

會稽韓友直

水拍吳江映綠蘋吳帆挂席起江津
一船書劍成都客滿路湖山上海春
貯酒郟筒來地遠行庖海錯帶潮新
雍公餘澤千年在更有文章溉後人

陶澤

師渡長淮宋事危
帟臣零落用儒衣
初疑葛亮才非武

終籍劉琨笑解圍百世文章尊讜論
一時陳迹羨知幾故家代有賢孫子
喬木分陰尚夕暉

高平范成

忠肅文章粲若星百年淪沒屢經營
青城閣老空遺恨笠澤雲孫夙有情
放棹長凌三泖曉掀蓬卧看九峰晴
勝游更可成初志尚覬重刊啓後生

張緯

南渡諸公已白頭深慙采石破狂酋
功勳不獨齊康樂忠義真無媿武侯
相業至今光竹帛文章何日復弓裘
道園未就平生志應待虞卿爲訪求

王廓

遺藁搖光貫斗牛鬼神呵護幾春秋
豐城寶劍終須合不是明珠暗裏投
乙巳歲春正月五日海陵徐克敬書

于雲間寓舍贈勝伯賢良表姪

雍國文章世不磨，昭如星日映山河。刻傳琬琰豈無待，價重璠璣不啻過。謾讀父書嗟我老，竟成先志子多。春風吹綠松江水，亦欲東游理釣蓑。臨邛魏奎

鴻山樵呂敏

南渡昔聞虞相國，白髮當朝憤不攄。丹陛九重無上策，青雲千載有遺書。諸孫禮樂流傳舊，異代衣冠喪亂餘。莫問銅駝卧荆棘，五湖烟水正愁予。河東王嘏

宋室中興業，雄才數雍公。一軍能却虜，諸恥論功科。斗遺文在麒麟畫，像空賢孫勞購覓。鐫刻示無窮。

薊丘聶鏞

編簡飄零二百年，購求今見子孫賢。固無相業當時重，要使文名後世傳。龍氣拂雲歐冶劍，虹光貫月米家船。鬼神呵護元無恙，只在吳淞若箇邊。申屠衡

扁舟衝雪訪遺書，雍國文章天下無。風動翠簾寒剪燭，月明滄海夜還珠。百年製作詞華盛，一戟勲名孝行俱。送子令人欽世澤，蒼蒼喬木錦江隅。勾吳王謙

勝伯契家過上海，求先丞相文集賦此。

鐘新班班卷八
山河一紀戰塵昏
文獻承家幾處存
傳語海隅蘇縣令
好求遺墨付諸孫
蜀人王立中

奉寄勝伯先生

病裏傷春念昔游
杏花天氣玉人樓
此時惟有雙雙燕
倦對東風說舊愁

夔守病三年想故人
不得一見因便風
以寄邵菴公
詩求一册以娛病中之懷
黃夔主臣

詩奉青城先生

虞卿落落不羈客
端如野鶴混雞羣
興來甫里一杯酒
與掃匡廬九疊雲
遺史尚求丞相事
從孫能輯翰林文

杜陵秀句多家法
春樹初生每憶君

此章舊懷繆作因形穢
故不及寄辛丑十二月十二
日淮南公穎兄自甫里過笠澤溪上袖出青城詩承
道問訊共與論詩夜分子忽憶舊篇誦之遂欣然寫
上唯高情亮察臘月望日黃章再拜

子貞還示佳章見寄因次韻以復克用高尚先生

單子歸來自笠澤為說虞君猶遁栖
青城從子識丹鳳
西郊草堂懷碧雞
後會驚看絲髻改新詩
煩向錦箋題
絕憐三泖冬無雪
肯學山陰夜泛溪
邾經上
和虞克用見寄

試拂龍泉劔虛涵三尺水直心憂社稷孤憤泣山陵牧
墅村村雨漁船夜夜燈感君多道氣懇欵實難馮

與金伯祥虞克用清夜聯話

浩蕩卽扁舟紆徐適廣路玄露蔽重陰澄湖潏洄客
雁度寒洲漁罾挂荒墅故人欣會面握手出深慄古篋
啓奇文微吟發清趣念茲慎勿忘勗哉紀良晤

克用先世乃冠

纓相家文章事業銘彝鼎被絃歌克用襲藏皆鯨珠也故云

陸廣

涼夜讀史擬古錄呈勝伯先生知己裁正

王靈靡東周諸侯務兵爭六國尚氣俠劫制非本情翩
翩魏公子南轅北遽輕折節信得士所怙匪尊榮雖云

正道媿砥礪多義名叔世駭莫見渴心劇懸旌丈夫一
委質便甘同死生豈如江上漚泛然逐春聲廢書有餘
歎露下候蟲鳴

友生董在拜手

青城虞勝伯顏丘氏小軒曰看帆爲賦律詩四首且
曰鄉情客思共有感焉因書以寄予予不敏勉次韻
錄奉叔勝徵君彥章高尚同一笑也

看帆軒下迥添愁滿眼青山憶舊游襄水信來家杳杳
蜀江春去思悠悠檣烏暝過漁莊宿風鷁寒隨賈客留
只尺波濤 相失往來曾不爲身謀

目送飛帆若斷蓬閑情不與水俱東自居茅屋秋聲裏

鏡新瑤卷八
如在瀟湘夜雨中檣影遠離滄海月棹歌歸趣落潮風
由來世道隨流轉不用空嗟阮籍窮

長江波浪雪差嵬險過瞿唐艷瀕堆龍護寶珠藏窟宅
蜃噓妖氣作樓臺依依鳥向滄波沒一一船從返照來
徐市漫游東入海如何不見一人回

風帆已逐歸雲盡江水何如客意長荏苒歲華駒過隙
飄揚生理雁隨陽從知白髮非春事醉看青山卽故鄉
獨笑夢中忘未得落花風動起回檣 謝林再拜

次韻叔勝先生七言一首錄呈伏與賜教倪瓚再拜
朱絃流水寫徽音古意寥寥何處尋道力已消金鑛淨

禪那曾住嶺雲深毀譽不得逍遙樂慾室應無忿慾心
說與先生 悵悵牛山何日見成林

瓚此三兩月方爲義士之賢子與二三名勝作爲文
辭以頌述其德美且預爲挽詩弔文之類家傳而戶
習或有每夜醉咏一過大笑而登牀者獨先生不隨
流俗衰衰耳如何如何故賦此以發一笑云乞於韻
會中檢尋埏字一觀明日卽納還也匆匆不具瓚啓
上

重改次韻奉荅一首錄呈叔勝先生一笑倪瓚再拜
朱絃流水寫徽音古意蕭寥尚可尋道業已消金鑛淨

禪那曾住嶺雲深猿猱騰攫初何怪風雨飄搖不動心
笑爾自戕成濯濯牛山何日見喬林

此間俊秀子弟習尚不佳爲二三不孝義無廉恥之
徒誘引而喪其良心以不孝悌爲當爲以講論是非
毀謗輕薄爲政事蘭蕙而尚化爲茅况中人之才者
乎先生以爲何如良心淪亡糞壤何異是可哀也十
三日贊啓上

虞山人勝伯陳山人惟寅皆爲鄉里解后共飲問及
仙游事欲所賦詩未果寫旣去僕已醉矣酒醒遂和
以荅二賢初意此凡四也十八日又錄

掃除狡獪蓄神機開頂葫蘆不置扉人物已從垣外見
真形漸向市中微杯成白鴿冲霄去劍化雙龍破浪歸
自此更無毫髮累綠毛繞體欲成衣

獨據胡牀醉不移坐深簷露滴髭眉蕭蕭風水成音樂
澹澹星河起鷺鷥語罷欲乘黃鶴去興來忽使白雲馳
火龍 傲烹茶 不折扶桑一氣吹

髯髯松陰布網羅鶴巢松頂吸天河是何道士圍碁坐
著箇樵夫對酒歌看月也知爲爾好凭風無奈欲歸何
送君直過橋西去還記垂楊葉不多

送虞勝伯還東吳

張適

相逢相別兩匆匆肯放花前酒暫空江渚落殘三月雨
海潮吹上一帆風客中憶母情偏切貧裏題詩語轉工
日暮思君頻悵望水天迢遞送歸鴻

克用道友作東吳十詠句法深有孟浩然意度超邁
繩其武學者未見達人之言吾道友當悉此意否
發吳江

一望洞庭秋水相看南浦孤篷江干有興騷客閑居久
約漁翁

泛石湖

遙接太湖惘然尚留赤壁圖景越來溪水東西香雪寒

梅飄影

游靈巖寺

此山勝景玄賞舊游今日皆非籃輿林間烟暝爛柯谷
口忘歸

登姑胥山

吳王館娃西子兩情斷送長流麋鹿淚沾荒草故人汗
漫重游

泊橫塘

山寺微茫深渡寒烟蒼莽橫塘杖梢自挑村酒船頭猶
帶漁榔

過盤門

將軍南鎮勾吳魚龍跳下江潮無限吁嗟陳跡怕聞淒涼洞簫

懷甫里

筇行依依故里石刊翰墨模糊龐公力田二頃拾遺扁舟五湖

過獨墅

短棹微風窈窕片帆落日橫斜舍傍雖開酒肆牛疲知是田家

過車坊漾

蕩漾滄波萬頃櫓搖白鷗渚傍不知新月東起回頭過盡車坊

歸闔閭浦

極目煙江盡頭屈指遙城渡口世人不理曲肱自餉黃雞白酒
農圃堂陸頤納

贈內姪曇霄

我聞唐宋及近代虞門簪紱紛如雲外舅蒼梧府君者上繼秘監傳斯文一女適我有賢德兄弟玉立皆蘭芬自從外舅歿官所歸隔山川魚雁阻兵塵浩浩各天涯夢寐中間時或覩老壯死生那得知子孫有無安可期

誰料內兄仲氏子一朝謁我來京師入門面目恍若識
頭已祝髮衣純緇細言六歲武昌別別來廿九年華移
闔家骨肉旣彫喪丹陽乳土鬱相向每嗟流落真可憐
石瀨何時得歸葬艱危幾脫虎狼口幸得爲僧在林藪
止有一兄作秦贅叔氏之子臨安有二人形影相惻惻
出家踪迹如雲萍遠聞姑丈歷清要豈知姑已歸幽冥
須臾言罷淚雙墮 痛 風生四坐使我聞之倍感傷
感傷之後喜無那桑田滄海自古然世家子孫能幾賢
當時不填溝壑裏必作丐者閭閻邊或爲奴隸甘箠辱
及遭俘虜罹刑戮孰若爾心不爲非落在空門遠塵俗

乃知祖宗積德深善慶源源報何速愛爾好文能作詩
驪珠紫貝光陸離虞門文業久陵替爾不承嗣當歸誰
荅云十八從佛教年今廿餘亦修蹈茹葷飲酒皆不爲
慈航彼岸終須到臨安一兄猶少年有妻有子宗祀傳
願廬丹陽墳塚前以永孝思終殘年斯言慰我如醇酎
夜談剪燭過子丑明日辭我飛錫去愧乏橐金表親厚
老懷悵望秋雨晴爲爾折斷石城柳七十翁詹同書于
翰林

贈霄上人序

吳興道場寺主曇霄上人來京師謁翰林學士承旨詹

公于寓宅詢其所自則公之夫人虞氏仲兄奎之子外
舅梧州府君之孫也于是不見者凡二十有九年而夫
人之喪亦二年矣而上人詣几筵哭奠弔慰如禮與公
道契濶敘艱危悲慟慨歎有不能喻之于言者蓋追憶
初別時上人甫六歲公年當強仕才名方盛不數載而
四方鼎沸風塵滿目音問睽隔不知存亡何似及皇
上龍飛江左平羣雄而一海宇制禮作樂登崇俊良公
以文學被顧問任天官而持銓衡長詞垣而知制誥
康寧壽考詠歌太平虞夫人猶及目覩公之榮遇足以
慰疇昔艱危之懷而上人游乎方外得以保全性命復

相見于今日豈非可喜而又可感者耶上人留京踰月
乃請于公曰我虞氏世家會稽自唐永興文懿公陪葬
昭陵遂爲雍人傳十一世有守仁壽郡者因家焉遂爲
蜀人又八世爲宋丞相雍國忠肅公公之季子大理寺
丞卒葬餘杭之石瀨鎮至我曾祖爲玉融令宋亡不降
遂死之時祖考梧州府君方七歲隸育于官及曾叔祖
仕元爲秘書少監無子因請于朝以府君爲嗣後廕官
初授光化主簿歷管城丹陽德安尹調湖廣等處摧茶
提舉陞朝列大夫同知梧州路總管府事卒于官謀歸
葬石瀨未果乃殯于丹陽縣南之清水潭墓今久闕展

省是行也願歸結茅菴于墓側朝夕居其間以盡孝思公不忘親戚之好尚有以教之公乃以其事語趙堦曰我舅與故奎章學士邵菴先生雍郡文靖公宗系同出於雍國忠肅公子嘗游文靖公之門有師友之契霄上人之行不可無文字以贊美其孝慕之誠也噫堦于先生爲門人于公爲屬官又何敢以固陋辭竊嘗觀于前代世家以其立德立功立言著于當世千載不朽者代有其人然由唐宋及元家譜相承以勲業文章照映史冊七百餘年遠而足徵未有若虞氏三公同出于一門者也今逢 創業維新之治其子孫雖未有顯者然

國家政教方隆安知無力學自修以待用者而上人托跡空門懷其世澤切切以祖宗墳墓爲念是其孝思無數過于庸俗人遠矣吾輩稱揚而樂道之豈不足以爲士大夫之勸乎謹以此言復于公退而次第書之以爲贈大理公諱杭孫宋阜陵所賜名也秘監公諱應隆在元嘗修大一統志今其板本猶存梧州府君諱弦字舜臣上人舊名容德以丁酉年入烏程何山禪寺禮南州藻公爲師法名曇霄字具瞻雖學佛而通儒書大義蓋其家學云洪武七年歲在甲寅秋七月甲午朔翰林國史院編修官清江趙堦序

上人曇霄者宋丞相虞忠肅公彬甫之遺裔也其姑歸
今閣老詹先生同文而上人因與先生有連一旦來謁
將還廬墓于丹陽先生請趙翰林伯友爲序且令予題
其左方西方聖人之教一則曰孝二則曰 故升初利
天爲母說法而所演大報恩經亦孳孳弗倦桑門每取
之以爲準的或者謂其絕棄親屬不亦過乎有若上人
通儒者而又善詩念家世之非昔祖宗墳塚遠在一方
悽然有白楊悲風之感縛茅而廬諸墓豈非有合西方
之教哉雖然此固足爲孝也西方以法胤嗣續爲至要
與吾儒甚不異上人能廬墓矣獨不念虞氏之乏嗣乎

若能幡然改轍歸繼宗祧之重其孝不尤大哉在家出
家同一法門居塵不染塵浮屠氏之戒也初何傷乎此
惟達人大觀無所係吝上人尚勉之焉若夫家世之盛
趙翰林序之詳矣予尚何言史官宋濂

良常張氏遺卷

送張吳縣之官嘉定分題詩序

吳以水爲國獨吳縣則皆山山萃起于洞庭烟浪之間
者其多至七十二峯先是子胥未入吳吳猶宮于靈巖
更今二千年故宮陳跡尚多存者登臨探討感念今昔
未嘗不令人惻愴興懷也吳縣尹張君德常以金壇文

獻故家早以才器知名江表奉其嚴尊避地吳下未幾
徒步起家爲吳縣丞縣遭隣境燒劫殺擄君雖丞其所
以恤民者逾於尹聲蜚實章遄陞縣尹使爲尹承平時
猶斤斤不易况軍旅殘破之後乎德常嚴尊老 白首
移其孝以爲政于一邑其惠及民者真所謂息黥而補
劓生死而骨肉無媿于古之人于是民氣稍稍復完今
茲五寒暑政譽洋溢用年勞擢授嘉定州同知夫旣尹
大縣民戴其德自宜尹一州然猶二一州于海隅者千
尋之木棟梁之具也然匠石養之而未之顧者其望者
大也早晚施之用且將支柱明堂清廟矣吳之人士于

君之行也姑分題賦詩以送君而屬遂昌鄭元祐爲序

賦得龍門

來龍起西北萬古壯此門日月互開闔風雲相吐吞龍
來海欲立龍去天爲昏至今兩絕壁慘澹波濤痕張公
東海客邀我坐石根仰瞻泰宇靜俯瞰靈湫渾神物固
莫測目擊道乃存歲旱 用汝霖雨清乾坤

廣陵成庭珪

賦得采香逕

泰伯嘗采藥深入芳菲菲攀桂作帷帳紉蘭製裳衣坐
令文身俗悉從端委歸支胤後君吳禮讓日漸違迷陽

行棘足靡蕪露沾衣三秀不改度齊房耀靈輝擷之薦
瑤席神享民是依
元祐

賦得靈巖

吳門有佳氣靈巖秀而高扶輿起中天橫絕望四郊築
宮念吳王乘舟懷越相如聞石鼓鳴不見西施唱花殘
采香徑木落洞庭波鹿銜如意舞曾合步搖歌霞邊錦
樹明石上琅玕長世無赤松子誰當共長往金芝餌處
士玉蘭貽使君煩將滄海月還照秀峯雲

宛丘陳秀民

賦得越公井

平湖朝崇岡石勢盡西走神宮闕海眼碑兀誰所剖偉
哉楊越公指揮擘山手灣環水府近決裂龍伯吼日供
萬夫飲鹿盧挂牛斗清寒散屏闌甘潤借林莽招提敞
殊勝遺事千載後顛倒樓閣影以茲歲月久張侯來作
縣胸中攄素有冽泉人共食博施澤彌厚遂令飲惠者
咄咄不離口何以爲君別汲之釀春酒行人感幽駐十
步一回首終當勒懸厓相繼垂不朽
吳郡鄭元

賦得石湖

范公如賀監吳越似同風一曲君王賜千年霸業空蕭
條湖水碧凌亂藕花紅相送青山暮孤帆沒斷鴻

錢唐范致夫

賦得鱸鄉亭

秋風吹江水鱸魚寒可曾江空野亭寂送客集高朋銀
盤錦鱗粲玉鱠春雪凝一杯曾酒罷千里吳天激願似
陳文惠勿同張季鷹

東吳高立復

賦得林屋館

具區東南浸日與青天流洞庭諸巒巖宛在水中洲黃
金千萬戶白玉十二樓陽阿積珍木轆轤枝相樛仙人
倏來往環珮鏘鳴球我欲往從之四山澹以秋安期不
可卽長年慕浮丘

江陰張端

賦得虎丘

中吳山川雄虎丘鬱嵯峨寶光蓄池坳劒氣凌巖阿龍
精不復出寒泉澄碧莎白晝起陰霾深潭伏蛟鼉巍巍
王者陵青青石盤陀自爾埴靈蹟千古潛妖魔壯哉晉
浮屠景象長森羅涼月濕蒼樹晴雲栖綠蘿屬當清秋
日愛茲佳致多登高餞別駕好風動鳴珂列宿光有芒
練祈水生波悵然轉回磴舉觴成短歌

青丘劉奭

賦得劒池

東吳古澤國虎丘萃磅礴泰媪閱神秀巨靈爲開鑿巖
壁立蒼翠哈呀露斷齧兩崖日色寒一道天光落闔閭

葬其下風雨夜移壑至今斗牛間紫氣恒炳若我嘗俯
瞰之或恐蛟龍躍令尹名家子物理素精博五年飲此
水遂蘇吳民瘼遷官練川上百鷺見一鶚白露零蔓草
秋容滿寥廓行須頌河清休聲著延閣 太原王逢

賦得天平山

茲山鎮吳會秀色削金碧拔地起萬仞去天不盈尺劍
矛輝日潔芙蓉承露摘龍門啓石泓天池湛玉液曾橫
松下琴屢駐雲間舄于今望山處蒼蒼暮煙隔

薊丘聶鏞

賦得白雲泉

白雲白如雪清泉清比月泉以白雲名雲泉兩同潔滴
瀝翠池滿琤琤玉琴咽斜侵落花徑直通鳴鶴埵觀蒙
欲果行委順能安節使君潔白操酌奉使君別

四明陳朴

賦得吳王井

九仞鑿山骨重泉出洞天聲虛響屨步影照捧心妍露
冷銀牀滑天空玉鏡圓養民功用在不計邑頻邊

會稽張憲

賦得太湖石

太湖一片石重巒八面回影枕碧波月身駸錦紋苔岸

嶠金峰隱玲瓏翠碧開玉露浮仙掌丹霞照天台雲淨
蓮花出星虛織女來相門題品舊堅貞冠古才

四明陳樞

賦得洞庭山

山湧洞庭翠雄蟠天下誇雲峰七十二面面是蓮花風
吹峩眉月影落湖上沙洞天闕玉室陽林耀丹葩粲粲
黃金橘天寒露已華採摘奉君別明發到天涯

勾吳周砥

賦得琴臺

靈巖鬱嵯峨上有古琴臺天光瀉石面月色流翠苔冥

冥烟鶴唳渺渺松風哀彷彿清商奏仙人騎鳳來雲旌
卷絕壁祖帳行瓊杯願言宓子賤去邑更徘徊

晉陵張體

賦得采香徑

一水直如矢千年流瀾瀾不見採香人滿湖生綠蘋湖
中送君別鶯啼疎雨歇明月出海邊清光照練川去去
蘇民瘼歌謠動城郭遺愛擬甘棠垂名若採香

廬山陳汝秩

賦得翫花池

方池漾春波繁花照寒玉金宮人正閑歡游弄芳馥君

恩深雨露花香滿山谷只愁恩易謝如花不待宿淒涼
去千載池水春自綠不見采香人聊歌送君曲

巴西鄧德基

賦得錦帆涇

風吹闔閭城花落錦帆涇錦帆去不返春流日夜生美
人在何處恨滿城邊路月明烏夜啼霜冷丹楓樹涇水
抱城流直通東海頭布帆挂落日相送練川游

清河張端義

賦得館娃宮

吳宮愛越女尚傳館娃時艷國上城碧宿莽雉朝飛媮

安不自戒捧心何足悲山石猶嗟峨伯業日以隳千年
歌舞地叢林禪衲栖送君一弔古臨觴慄不怡

崑山盧熊

賦得放鶴亭

古亭誰放鶴傳之支道林當其放鶴時同有萬里心白
雲瓊圃樹明月緱山岑側聞長老言千載復來今海鶴
雖非鳳猶能覽德音使君甚愛鶴更有一桐琴

吳郡王行

賦得響屧廊

吳王厭歌舞輕屧夜深鳴安知越溪女舉步國已傾至

今山頭月空照千古情清響聞葉落遺跡見苔生方悲
故宮換復送故人行他日明光殿君王聞履聲

渤海高啓

賦得梧桐園

彼美夫差園檀欒蔭青桐上有五色鳳結巢明月中疎
花落銀井墮葉響金風斲琴世所貴剪圭王曾封賢侯
瓌奇士材美將無同願爲匠石頌置之楚王宮

高郵龔宜

賦得白公檜

昔賢蒞吳會嘉惠蕩已施爰茲休暇日樹彼凌寒姿鶴

骨峙深沚虬枝跨芳坻歲蕤冒氛靄蒼蔚含華滋勁質
詎有歇貞心諒難虧千載人所欽遺愛猶在茲顧君重
典郡斯躅邈以追孤根爲扶植令名同久垂

吳郡黃本

賦得百花洲

春花迷繡幄春水漾金鳧照影和明月流香過石湖錦
帆應不見沙鳥自相呼感舊復傷別愁傾雙玉壺

延陵徐文炬

賦得採蓮涇

吳娃蕩蘭槳採蓮戲綠波蓄心留翠房低頭避高荷採

蓮不見藕刺傷將奈何使君善爲政聽我採蓮歌

江陰張瑄

賦得辟疆園

曉行辟疆園遺跡已蕪沒當年多肯構金谷不可越榮華一過眼春風長薇蕨固知天地間盛極乃衰歇空餘園中柳行子當攀折折盡短長條聊以贈君別

海昌董翔鳳

賦得夫椒山

夫椒洞庭野積翠窅冥間水倒青蓮影雲梳玉女鬟迴峰驅越騎挂月照吳關今古皆陳迹傷離慘別顏

無錫顧常

吳縣鄉三老顧子明求送前縣尹張君德常改除嘉定州同知詩西澗老樵賦此爲贈

亂離安輯撫瘡痍保障帡幪及此時感德陽春元有脚掄材月旦本無私江湖水濶波濤息雨露恩深草木知三老手編遺愛傳送行當就去思碑 至正庚子冬蘇昌齡愚公

送張別駕

一天風雨洗炎埃父老歡迎別駕來撮蚤鷓鴣還避去朝陽鸞鳳却飛回吳門善政人爭頌海國甘棠手自栽

世壽堂中時進酒綵衣屢舞笑顏開

燕山曾朴

送張府判詩序

至正丙申春江西等處行中書省平章政事楚國公渡江來吳念吳民多艱牧字者多非其才悉選而更張之自令丞簿尉以及錄事錄判同日命十有一人各賜衣二襲馬一匹粟若干石肥粃旨酒有差而丹陽張君德常其一也德常時爲吳縣丞三年以考績上陟縣尹又明年除同知嘉定州事壬寅秋調松江府判官於戲張君自筮仕以來甫十易寒暑已遷歷四任抑何速耶且受命之日如德常者十有一人七年之間餘悉坐免而

德常不惟僅存又藉藉若是謂之非賢可乎不特此也德常受命以後朝徵暮辟進用者不止百輩坐免者有之刑廢者有之固不可指而數然則德常不惟賢于十人而且賢于百人矣自今以逞德愈隆操愈厲松栢之姿久而彌固則今之桃李安知不見其衰且歇也德常之賢又豈止百人而已耶且聞千人而得一人不少也百人而得一人已富矣今楚國公十人而得一人則楚國公知人之明賢于人遠而才之衆可見矣噫楚國拔之而太尉用之德常所以辱知于二公者寧不思有以報之耶德常之調松江也大夫士咸歌以送之淮南袁

君達善俾基序其首因撫楚國公援君之意以重勉云
西蜀楊基序

種樹不問根樹生枝葉空樹陰不復好那得振其風誰
云種者去猶得種時功世道果相容嗟嗟張府公

至正二十二年壬寅秋九月十一日華蓋柏浮丘公
酒史在林屋 東陶篷下識

萬彙涵濡雨露中百年文物倏飄蓬鱸魚獨擅吳中美
驥足寧知冀北空肝膽幾時酬楚國里閭從此變王風
吳松江水秋無底好與使君襟抱同 豐城余詮

張侯喜與茅侯代瀟灑黃堂兩使君陽羨溪山空在望

吳松風月且平分漢廷亟用三章法晉士猶傳二陸文
今日顛厓政草在慈祥愷悌是功勳 廣陵成庭珪

三年練水治又復調雲間粉署華生筆吟屏雪滿山髻
因黎庶白衣爲老人斑賴有顧明府論文或解顏

淮南袁章

雲間判府拜新除亂後衣冠喜用儒一派清流出大壑
九苞丹鳳下蒼梧江鱸白嫩供秋饌海米紅尖追夜租
亦欲亭前聽鳴鶴五華清夢可能無 練川何恒
喜聞張別駕聽鶴過華亭屢試匡時策猶傳教子經篆
香凝燕寢書舫泊鷗汀遙憶題詩處青山繞郡廳

雲間徐士茂

練祈門外曉停車別酒迎風入面花白首愛民如愛子
赤心憂國似憂家龍迴夜影江沉樹鶴怨秋聲月在沙
煩語虎頭賢二守客星何日泛歸槎
扶風馬庸

良常草堂詩

朝余升兮良常之顛暮栖子兮良常之下謂良爲常兮
誰哉暴者余守余篋母哆其肱篋中之藏孔子之書謂
堯湯賢謂商辛愚孰憎是言我獲其餘孰好之者往餽
一鴟

子素言張德常好今古文作良常歌 李孝光

一室良常洞幽深太古茅風瓢元自寂畦甕不知勞獨
出逢騎虎初來學種桃還應白雲裏遲子共游遨
翠壁鄰丹竈青楓背草堂琴書聊卒歲麋鹿自成行疊
澗流杯滑飛花入座香寧無問津者及此繫舟航

倪瓚

題良常張處士山居一首

良常標名山句曲主仙洞茅君倚翠麓白雲滿高棟上
有巖栖士出入與雲共芝草鳥爲耘桃花鹿銜送茅君
見兄弟夙昔勤遠夢子獨擅爲鄰幽深補其空風飄懸
雅樂靈朮分仙供息我山木陰懷人玉簫弄暫時苦勞

事非必能抱甕洗藥愛源泉掇英比朝饗歸靜其抱一
知尚亦殊衆鶴馭來何方尋君引余鞚 延陵吳克恭
過江山色萃良常碧樹陰森結草堂處士不知人世變
更求丹篆寫仙方 朱澤民

故人讀易向華陽萬箇松間一草堂最愛滿山春雨後
白雲晴護藥苗香 韓友直

草堂價爲青山重山是良常乃結茅華屋雲低疑洞府
醍醐泉滑見春庖心清已識金銀氣世難曾懷鴉鵲巢
勾曲晝寒丹室火海鄉塵暖雪林梢冥冥高岸深爲谷
泛泛生涯苦佩匏傾耳在天鈞九奏抱情方雨鼎三爻
中條晚歲需休老南岳何年敢獻嘲近說金壇仙夢接
青葱林屋擁旗旛

至正辛丑夏五月張天永寫于棟江雪篷

句金壇下幽人宅斲桂爲梁蔭白茅畦長藥苗過野

瀑流 子入山庖鹿迹散漫春苔徑鶴影襜褕曉露巢
池上僧碁聞竹外嶺頭樵曲落松梢舊來長史留虹篆
時過神君響鳳匏坐石修將琴別譜焚香讀盡易諸爻
盧鴻圖在宜終隱杜甫詩成詎解嘲不待馳烟勸逋客
三峰蒼翠拂雲旛 河東張翥

蕙帳空招隱者居玄猿白鶴夜愁予只今百尺長松下

何處草堂宜讀書

良常 是鄉關窈窕軒窓遠近山獨有荆溪舊時月

屢隨歸夢往來間

蔣堂

翩翩張公子結茅良常山緣知鍊金液足以要朱顏玉
桃花開水潺湲琅玕芝草繞池碧子復來往三峯間三
峯峩峩昔所憇積金寥寥半空峙松厓月黑歸青猿石
林丹光中夜起人間日月如流水別來夢此三千秋茅
君兄弟豈相憶張家草堂思一游神仙不知王伯圖紛
紛喜怒無時無華陽便問歸路熟三十六洞吾何須

魯鈍生馬文璧重賦

予常爲德常記草堂矣復見此卷誦五峯之詞甚奇古
仲穆使君之篆筆力遒勁澤民若水之畫清潤張助教
之詩流麗皆令人歛衽故爲之識其後丹丘柯九思題
于王氏環慶堂

荆溪王仲德以故宋將家子孫博古嗜學延致金壇張
天民先生于其家德常蓋先生子其父子績學能以其
道行于荆溪荆溪之人爲其父子買田築室居甚充然
故朋從枉訪仲德必至德常之家飲酒賦詩蓋亦極其
一時之盛卷中所謂良常草堂者德常扁其室示不忘
金壇故居日接良常之山也俛仰二十年間不惟朋從

大半淪落而荆溪更世變化爲瓦礫荆棘無復人烟仲
德避地入杭聞已物故獨德常父子僅存全其中吳而
德常以文學今爲吳縣尹子與德常最友善觀畫讀詩
感念存歿爲之慨然遂昌鄭元祐跋

良常草堂詩一卷金壇張君德常家山圖也君之尊翁
鶴溪先生以高年碩德沉浮里社一家父子兄弟自相
師友文風藹然人望雅歸重之承平無事先生攜諸子
諸孫杖履往來之間衣冠偉然望之如神仙披圖尚可
見彷彿也意當時繪圖賦詩摹寫其幽野閑適之趣經
營慘淡惟恐不盡豈知後來之世變無窮有不可言者

哉此卷前歲失之中吳兵間今歲得之中吳僧所父子
相顧欣然譬若神明頓還舊觀蓋畫存而草堂則無矣
草堂旣無而良常之跡如掃矣臨風可浩歎也且乾坤
是處可構草堂使今日卽爲之未必能如前日之可喜
也此卷猶存豈不當寶惜之乎按輞川草堂有畫無詩
香山草堂有詩無畫獨浣花草堂以杜少陵名重天下
非草堂可貴直以老杜流離跋涉歷嘗險阻情可念詩
可歎而重之耳然則君之良常草堂得不與是類與夫
草堂與世道本不相關也先生鶴骨如玉壽可百歲天
定時平行將歸葺舊隱此卷實爲之張本彼鍾山云云

正可一笑揮去因閱此卷謹題其後以志予之所感至
正十八年人日趙郡蘇大年謹書

予舊藏張德常分題贈行詩卷皆元季諸老手筆後句
容曹廷瑞中書出良常草堂詩跋亦張氏物也因借錄
于行卷楮尾得以併攷見其故家文獻云節齊劉珏識

題張先生良常草堂五言一首

每愛草堂幽來爲竟日留獨當山一面更近水西頭繞
舍栽青竹開牕看白鷗拾遺茅屋好不得近鄜州

潘純

近聞結屋在荆溪溪上春山翠欲迷一箇小橋容鶴過

兩株高樹着鶯啼林君漫擬移天竺杜老無煩卜瀼西
何似先生樂真隱好詩還向畫中題 倪中愷之

溪上開新館高齋擁翠蘿彈琴拂石薦垂釣得鷗波道
士籠鷺至門生載酒過春風看花處隨地樂行窩

范德源

題草堂圖

珠樹風來學鳳鳴玉泉雨過作琴聲識得良常洞中路
前生我本山玄卿 張雨

幽館曉山如沐斷橋春水初生花下班荆酒熟松間散
策詩成 柯九思

結屋政臨流水開門巧對長松爲待神芝三秀移居華岳西峯

倪瓚

家住華陽 長松映草堂平生有高致不似賀公狂

陸友

和靖處士嘗賦詩曰山水未深魚鳥少此生猶擬再移居只應天竺溪流上獨木爲橋小結廬以中之大父鶴溪先生自金壇移居荆溪因以中相過話處士舊詩戲爲圖此瓚

相近方隅洞良常別有天草堂朝看雨藥圃夜春泉邈矣盧鴻一奇哉魯仲連君看遺世者若箇是頑仙

德常久索良常草堂詩未就及觀華蓋山人碧箋書五言因追其韻頃刻成章雖爲草堂未至之客可以無愧矣癸未歲十一月望日句曲外史張雨題于荆溪之上

想見茅山路深藏隱者廬平生懷勝境此地得幽居林黑時聞虎溪深或見魚相期學仙侶童子候階除

韓與玉

每愛良常山水勝草堂松竹更清奇據梧讀易玄猿聽拄杖看雲白鶴隨石鼎注泉春煮茗竹牕留客夜彈碁晨昏定省營甘旨獨掩柴扉細和詩

李子雲

宿鶴溪先生荆溪草堂

高秋欲赴草堂招身世驅馳百慮囂今日故來尋舊約
梨花春酒度清宵

宣伯炯

題石民瞻畫鶴溪圖

白鶴翩翩入太清溪流不盡松風聲髯翁筆底有仙路
倩渠更寫芙蓉城

張雨

鶴溪近與練湖連一鏡秋水清無邊依稀淮岸瀟湘浦
慣見月虹書畫船山翁幾年吳下客溪草溪花未相識
筆牀茶竈老玄真肯與鷗沙分半席

仇遠

題張氏世壽堂

奕奕金壇世壽堂鍾才應運適相當練川新借光華月
吳縣陰垂蔽芾棠孝友已堪民表率清廉更作吏隄防
殷勤父老求篇詠寫向奎仙品藻傍

鄭元祐賦

繙經一首奉簡天民有道先生

矯矯金壇八十翁繙經收得大乘功瞳人水剪琉璃碧
舌相香噴菡萏紅一邑絃歌蒙子化四牕燈火與孫同
太平有日歸陽羨還理田園樂歲豐

吳下鄭元祐頓首

鶴溪溪上老仙翁八十康強寡欲功鬢雪頗因詩債白
臉霞不藉酒潮紅百年世事遽如許千載襟期誰與同

閒閱梵書消永晝不關祈福乞餘豐

趙人蘇大年奉和前韻

稽首毘耶鶴髮翁法言微妙總天功菴摩勒果能纖細
優鉢曇花是向紅心悟法華應解轉手提諸佛竟誰同
真源一洗繁華夢蔬筍瓜蒞貌亦豐 勾吳周砥次韻
已愧吾儕髮漸翁有親猶樂校讐功涼雲竹委湘簾碧
春雨萍翻墨沼紅鄉井音書時節異兒郎伯仲起居同
吳城百里絃歌邑燕領先推穀世豐 義興岳榆次韻
平生摹楷漫塘翁晚節兼修靜定功貝葉翻時香篆碧
天花散處佛燈紅知君避地交游少憐我儲生嗜好同

有子孝廉名藉甚絃歌吳邑致時豐 王東晉越次韻

蒼顏白髮鶴溪翁養氣怡神素有功得句秋江楓葉冷
繙經夜室燭花紅承家有子朱衣貴繞膝多孫綵服同
愧我迂疎遁丘壑瓣香喜得拜南豐 孟栴次韻

奉簡天民有道先生

令子今爲吳縣尹先生猶是葛天民春秋七十又八歲
江海百年能幾人多士問奇加束脯諸孫供饌斫修鱗
荆溪舊業知無恙白鶴來時送喜頻

至正十八年仲秋前七日廣陵成庭珪書

成廣陵先生以詩寄張先生韻度深穩謹依韻奉和

金華瑤卷八
白骨自應無葬地青山可復有遺民何時得返屠羊肆
古廟無慚刺虎人製錦邑中推令子聽經池上躍修鱗
綠雲洞裏遺編在循省加工莫厭頻
元祐頓首

已分環樞菽要津謾從書冊訪遺民還鄉杜甫何如客
嗜酒陶潛若箇人風定玉林雲鶴鶴月明珠浦水鱗鱗
移家縣令談玄舌笑殺吟詩國步頻
岳榆次韻

奉簡鶴溪先生次成高尚韻

憑高每挈無言子閱世猶嗤橫目民一邑絃歌稱有嗣
百年儀表屬斯人自西郊多戎馬誰識南溟有縱鱗
雪霽溪山陪杖履荆南最憶往來頻
句容周砥再

拜上

久欲賦一詩以慶靈飛經于寶匣

藏得鍾郎萬字經虹光夜夜射天星使來海上持龍節
輦下雲端拾鳳翎金母授書黃帝闕玉真按筆紫霞扃
勤修苦煉資輕舉濯足明河上九青

遂昌鄭元祐頓首上

和遂昌鄭先生題大尹所藏唐人書經

誰授靈飛六甲經中天夜降女星霓旌羽從三青鳥
雲篆鸞回五采翎仙殿清齋繙秘笈御題珍錄護神扃
不堪重省前朝事宮闕荒涼蔓草青
盧熊再拜

雪鬢龐眉詠玉經宛然南極老人星石壇帚拂青鸞尾
烟閣衣飄白鶴翎寶氣虹光輝日角錦囊瑤軸閱雲扃
道成騎鹿三山去瀛海茫茫萬仞青

周砥次韻

憫農歎一首送德常縣尹出郊勸農兼柬

國瑞相公幸加省覽

日月底天廓勸農正其時昫昫土膏動穆穆條風吹渚
花尚自媚汀柳亦間垂中吳號沃壤東作多黎遺首更
太伯化民俗恒熙熙一從干戈興殺擄令人悲草生鬪
體眼竈絕茅茨炊十室存二三燒劫偶見遺官租不少
貸民力何由支張侯尹吳縣冰蘖嚴矜持徵科淚暗落

且復鞭瘡痍茲當東作興載耜循年規文告加勉勗心
傷爲嗟咨田老鋒鏑餘僅保骨與皮猶復望歲豐迎拜
攜孤嫠茹芹敢望飽無力堪鉏犁嚼蝨恒苦腥飯牛恒
苦饑侯爲百里尹腹笥盛詩書民勞曷小康民病曷小
醫號文諫周室千古有令儀咽餓啗兒肉何人埋父屍
民力苟不蘇天鑒亦不私上帝專主宰臣言諒非癡

吳下鄭元祐頓首

至正二年壬午九月僕與高昌正臣游張公洞天張德
常期而不至殊懷其人不禁清興故作墨竹以寄之前
奎章閣鑒書博士丹丘柯九思識

丹丘寫竹師老可能寫倒影青琅玕張芝草堂雪色壁
壞葉蕭蕭烟雨寒

瓠齋

柯公自比米顛子文采照耀青琅玕只今耆舊凋零盡
剩得潘君瘦竹寒

倪瓚

題趙松雪詩藁

趙文敏公書出于晉詩及乎唐固一代之能事也觀此
卷令人歎慕不已德常其永保之至正二年壬午九月
十又六日丹丘柯九思題

松雪翁嘗云凡作字雖戲寫亦如欲刻金石今觀其
草點竄塗注間皆不苟且誠哉是言也濠梁李升

趙翰林高情散朗殆似晉宋間人故其文章翰墨如珊
瑚玉樹自是照映清時雖寸縑尺楮散落人間亦莫不
以爲寶也今人工詩文字畫非不能粉澤妍媚山雞野
鶩文采亦爾爛斑至其神韻則與孔翠殊絕此無他固
在人品何如耳此卷張德常得之翰林之子仲穆處盧
山甫二月廿日見過田舍攜以示僕因題倪瓚至正二
年壬午歲也

宋程伯子書字時甚敬謂非欲要好只此是學人皆知
之而涵養工夫蓋鮮今觀松雪翁詩遺稿一點一畫皆
昭然絕異竄改之跡想見不苟其文章書畫爲學者宗

匠固亦宜哉吾德常敬事善學得此卷而珍襲之其意深矣吳郡後學羅元題

題德常小像

冠切雲之崔嵬佩鳴玉之琳琅丹青彷彿其形似氣象已絢爛乎文章深注意于林泉而託跡乎軒裳耕釣于荆溪笑傲于良常豈出岫之閑雲亦九畹之孤芳故將縱浪大化游詠天和周旋罄

追琢磨于躬有光而

奕世其昌者耶

黃鶴山人王蒙謹題

冠綸巾服素衣靜式後昆動揚前徽濯埃氛于宴景憺山水之清輝吾固知其夷險一節出處顯默之間惟德

之常而從容于道機者

馬治

向年予客荆溪岳君仲遠家仲遠中表姻戚多若王君仲德其一也仲德以宋閔閔居州市時延至金壇張天民先生訓飭其子弟居久之先生德孚其身行孚其人凡溪大家無不敬慕之者于是買田築室請先生挈家荆溪之上今吳縣尹德常則先生冢子也德常日侍其親內而家庭外而朋舊人人得其驩心暇輒讀書講學德業滋進于是德常充然爲荆溪之逸民夫何淮甸兵興而荆溪遂爲戎首向所謂田園室廬盡爲瓦礫德常遂與先生避地來吳以才名著聞起家吳縣丞由丞陞

金華瑤苑卷八
尹縣遭亢旱焚劫而德常能涵煦以仁恩自非才美兼
具其能若是乎遂昌鄭元祐與德常有世契見其松石
小像而喜之爲題于其上云

鍾英金壇蜚聲荆溪以孝以友身修家齊避地來吳起
家佐邑陞之製錦藹乎仁術峩冠野服松石之間逍遙
天游良常之山猗歟先生有此令子爾公爾侯必復其
始
誦詩讀書佩先師之格言登山臨水得曠士之樂全非
仕非隱其幾其天雲不雨而常潤玉雖工而匪鑄其據
于儒依于老逃于禪者與

錢唐王生思善畫德常時年四十二矣東海倪生贊
之曰云云德常高情虛夷意度閑雅顧非顧長康之
丘壑置身曹將軍之凌烟潤色又那緣得其氣韻耶
王生蓋亦見其善者機耳今日因過德常草堂出此
圖求贊且欲作樹石其傍乃先綴數語像上樹石俟
它日補爲之

世壽堂銘

古之君天下者歛福於其已以敷錫于天下之人故人
有樂生之心無歎息愁恨之苦有壽考之徵無天闕折
傷之萌武王訪道箕子大經大法畢陳之矣而終之以

五福蓋以爲人君貌言視聽舉皆合乎天至於思而睿作聖則又無所不昭合乎天矣人君與天一致而無二則歛福于已者豈私其躬而已哉刑賞威柄惟天是循子養萬民惟天是法舉熙熙然游于太和元氣之中甘露之所霽霖祥風之所披拂則其享遐齡躋壽域斷非厚誣斯世也氣錯而薄世澆而漓夫以孔子之聖而不獲歛福以錫民顏子之賢而不獲享有壽考此其扶輿而磅礴者或清或濁或媿或惡有不可得而窺度也此雖媮薄已甚而王澤猶存民猶有享壽祺者然益罕矣故視曩時耆舊有傳耆英有會九老有圖蓋如鳳皇麒

麟不可復見也已况自兵興以來鋒鏑之下燒劫之餘荆榛骨骸沙莽蕭瑟亘數千里無復人烟兵旣之慘未有甚于今日其幸存而竊活者方溝壑是憂又何知壽考康寧之謂乎而金壇張德常廼于吳中所寓之室扁曰世壽堂以奉其父天民先生居之先生今年八十歲耳聰目明氣神滋王其大父愛山先生年七十五歲而終其曾大父定軒先生于書無不讀于學無不講宋季趙信公最知人將起先生以共事先生知事不可爲力謝絕之日與漫塘劉先生實齋王先生優游以終老其卒也年九十有三伯父叔剛先生年七十有二至其兩

老姑今皆年望九十起居無恙世言壽有種其信然與夫承平之日世享壽齡固足以夸艷今天下洶洶而德常以才幹在吳縣由丞陞尹人稱其賢既能養其父以孝聞又能推其上世耆年夙學以表章暴白之抑亦何修何爲而能若是耶豈昔之人當錫福之盛深培厚植不少槩見於世故其世壽若此其未已耶德常今則施之于用而其厚德之積則又在德常也遂昌鄭元祐辱交于父子四十年矣乃爲銘其堂銘曰

金壇之山實系地肺山明川媚聿鍾人瑞卓哉定軒翁灼有見乎宋之季身躋上壽名高一世有子有孫俱享

遐齡天何所聞惟其德馨德馨苾芬三壽作朋永言世壽以堂以構壽若有種善培滋茂良耜澤澤斯種斯穫我銘於鑠惟有秋無斃

身世蕭蕭一羽輕白螺杯裏酌滄瀛逍遙自足忘朋晏漫浪何須問姓名石鼎煮雲聽澗雨玉笙吹月和松聲馮君爲問張公子曾到良常夢亦清

十二月廿四日馮高士訪予笠澤旅寓相與游從累日其操行孤削居處簡易有古高逸之風從容話及德常明公學行之美與僕交義之篤因言欲以書札枉問以僕深相怪恨遂不復作記此無他聽雙鳧讒

金縢瑣瑣卷八
三
謗之過也雙鳧以十年前博奕之物翻悔不遂竟嗔
恨而去知其動與讒于其所識非特執事也鼠輩小
計僕固不恤但可笑耳王半山面有黑黥人教用園
芟煎湯洗面半山曰天生黑于予園芟其如予何但
執事不明之愆則不可逃一人譽之從而敬之一人
毀之從而怒之可乎所謂惟君子能好人能惡人不
知好惡賤子于明公之前者君子人歟非耶其亦在
聽言之審耳執事以爲何如謹以奉問千萬還示數
字幸甚尊君鶴溪先生侍間道瓚懷仰之私也瓚再
拜

聞道淮安之任去尊君合住叔兮家來城又鼓吳淞柁
好過吳淞弄釣車

比聞從者來吳城日夕之官淮安復往吳淞迎尊君
矣舟經笠澤能一枉顧否因令弟德機徵君之便輒
成小詩以寄倪瓚再拜 良常府判明公執事
比附蕭從善一書往會達否瓚廿五日謹空

瓚再拜新春伏惟履候多福欲往展賀村野畏人不出
耳昨有數字與令似想會過日晝匣倘要用當送去無
用則已先公竹杖脚爐小巾倘有之希尋以見惠無則
不煩也元度入城何日還還日爲致意謹承候匆匆不

具十一日瓚啓上

良常先生執事

八月四日老鐵頑帖上德常相公先生屢承問病乏力不能接對今日體力稍勝忽老胥吳讓者泣拜牀下自陳八年淹滯相公憐之欲行叅補而有優游不斷者阻之閣下窠缺告天無路惟有覓死地而已其情可哀今假老夫一言欲相公補押一案爲來官收錄之階必公賜可此事不徒協衆論亦繫相公平日陰德事也扶病爲布此楮惟冀委察焉不具頑帖上悚恐謹後空

至正辛丑十二月廿四日德常明公自吳城將還嘉定

道出甫里振柁相就語俯仰十霜恍若隔世爲留信宿夜闌更秉燭相對如夢寐者甚似爲僕發也明日微雪作寒戶無來迹獨與明公逍遙渚際隔江遙望天平靈巖諸山在荒烟遠靄中濃纖出没依約如畫渚上疎木枯柳似我容髮蕭蕭可憐生不能滿百其所以異于草木者猶情好耳年逾五十日覺生死忙能不爲撫舊事而繼遠情乎明公復命畫江濱寂寞之意并書相與乖離感慨之情棕德常今爲嘉定同知于民有惠政卽昔日之良常山人也朱陽館主蕭閑仙卿倪瓚言

艇齋

德機僦屋藍橋以教授爲業屋之西隅有軒翼然卽所謂艇齋也歐陽公有齋名畫舫其記云舫者嬉游之舟不知德機之舟將以涉大川乎其亦乘以嬉游乎將出入二者之間所謂乘流則逝遇坎則止乎因篆二字使張於屋壁稍暇當爲記之七月二日胡悌書

題德機荆南精舍圖

誰畫荆南精舍圖烟霏嵐翠墨模糊林間野鹿時相逐
洞口山猿不受呼尚有清泉悲夜雨已迷幽逕入寒蕪
癡人莫彈西飛鶴雲外仙君恐姓蘇
近作寫呈德機兄求教胡悌再拜

倪瓚

明朝又上闔閭城江上春風一舸輕過眼落花應有恨
傍人飛絮自多情本應世亂依劉表誰謂才多類禰衡
試問龐公歸隱計南陽何地可躬耕

贈章伯高

共是多情惜歲華故應美酒送生涯金盞細斫秋風鱠
玉髓新烹穀雨茶每愛芙蓉依北渚還思蝴蝶過東家
江南三月鶯啼遍不信櫻桃未着花

平生豪氣慕西洲莫怪眉攢萬國愁商皓不知秦正朔
荆人曾紀魯春秋新豐酒美春三月劍閣詩多歲一週
中夜聽雞真欲舞高桓事業在營丘

詩寄德機判簿

十載無家客東西幾播遷已拚書馬券留作買山錢處
處荆花好枝枝棣鄂連將車日來往便比草堂前

六月廿七日書于吳中客船 經

隱居城市絕塵埃秋菊春蘭手自栽一卷楞伽讀未罷
南山相對舊崔嵬

戶庭不出倦逢迎淨室焚香也自清來客莫煩談世事
石牀分坐話無生

翠石嶙峋分外幽叢蘭生近澗西頭畫圖來自重居寺
相對令人憶聽秋 聽秋道者爲文甫畫蘭石

清閼閣前春雨時一枝醉裏寫臨池因風遠寄栖禪侶
山寺迢迢傍水涯 雲林寫寄白馬寺令歸文甫

丁亥歲夏五月勾吳張穀 跋不錄

雜錄

金瓶梅詞話卷八

五

--	--	--	--	--	--	--	--	--	--	--	--	--	--	--	--	--	--	--	--



